

# 大般涅槃经

(三十六卷：第十卷至第十二卷)

北凉天竺三藏昙无讖译 梵

宋沙门慧严慧观同谢灵运再治



南無本師釋迦牟尼佛

## 说明

本简体校正版《大般涅槃经》（南本）电子书，是根据《乾隆大藏经》大乘涅槃部，第 0110 部，北凉天竺三藏昙无讖译梵、宋沙门慧严慧观同谢灵运再治《大般涅槃经》(36 卷)影印本校正的。标点符号仅供参考。

为了便于读诵，本电子书按顺序每三卷合为一册，共十二册。若每天读一册，可十二天读完。

本电子书是免费结缘品。特此说明。

仁慧草堂

二〇一八年九月

## 目 录

起诵仪 .....	- 1 -
香赞 .....	- 1 -
开经偈 .....	- 1 -
大般涅槃经卷第十 .....	- 2 -
一切大众所问品第十七 .....	- 2 -
现病品第十八 .....	- 22 -
大般涅槃经卷第十一 .....	- 38 -
圣行品第十九之一 .....	- 38 -
大般涅槃经卷第十二 .....	- 74 -
圣行品第十九之二 .....	- 74 -
结诵仪 .....	- 99 -
补阙真言 .....	- 99 -
发愿文 .....	- 99 -
回向偈 .....	- 100 -
回向偈 .....	- 100 -
三皈依 .....	- 101 -



## ● 起诵仪

### 香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

### 开经偈

(一遍)

无上甚深微妙法 百千万劫难遭遇  
我今见闻得受持 愿解如来真实义

# 大般涅槃经卷第十

北凉天竺三藏昙无讖译 梵

宋沙门慧严慧观同谢灵运再治

## 一切大众所问品第十七

尔时，世尊从其面门，放种种色，青、黄、赤、白、红、紫光明照纯陀身。纯陀遇已，与诸眷属，持诸肴馔<sup>1</sup>，疾往佛所，欲奉如来及比丘僧最后供养，种种器物，充满具足，持至佛前<sup>2</sup>。

尔时，有大威德天人而遮其前，周匝围绕，谓纯陀言：“且止！纯陀，勿便奉施。”

尔时，如来复放无量无边种种光明，诸天大众遇斯光已，寻听纯陀前至佛所奉其所施。

尔时，天人及诸众生，各各自持所贽<sup>3</sup>供养，至于佛前，长跪白佛：“惟愿如来，听诸比丘受此供养。”

时诸比丘知是时故，执持衣钵，一心安详。

尔时，纯陀为佛及僧布置种种师子宝座，悬缯幡盖、香华<sup>4</sup>、瓔珞。

<sup>1</sup> 大正藏：持诸肴饍

<sup>2</sup> 大正藏：所

<sup>3</sup> 大正藏：各各自取所持

<sup>4</sup> 大正藏：华香

尔时，三千大千世界庄严微妙，犹如西方安乐国土。

尔时，纯陀住于佛前，忧悲怅快，重白佛言：“惟愿如来，犹见哀悯，住寿一劫若减一劫。”

佛告纯陀：“汝欲令我久住世者，宜当速奉最后具足檀波罗蜜。”

尔时，一切菩萨摩訶萨、天、人、杂类，异口同音，唱如是言：“奇哉！纯陀，成大福德，能令如来受其最后无上供养。我等无福，所设供具，则为唐捐。”

尔时，世尊欲令一切众望满足，于自身上一一毛孔化无量佛，一一诸佛各有无量诸比丘僧。是诸世尊及无量众，悉皆示现，受其供养。释迦如来自受纯陀所奉设者。

尔时，纯陀所持粳粮成熟之食，摩伽陀国满足八斛，以佛神力，皆悉充足一切大会。

尔时，纯陀见是事已，心生欢喜，踊跃无量，一切大众亦复如是。

尔时，大众承佛圣旨，各作是念：“如来今已受我等施，不久必<sup>5</sup>当入于涅槃。”作是念已，心生悲喜。

<sup>5</sup> 大正藏：便



尔时，树林其地狭小，以佛神力，如针锋处皆有无量诸佛世尊及其眷属等坐而食，所食之物亦无差别。是时，天、人、阿修罗等啼泣悲叹，而作是言：“如来今日已受我等最后供养，受供养已，当般涅槃，我等当复更供养谁？我今永离无上调御，盲无眼目。”

尔时，世尊为欲安慰一切大众，而说偈言：

汝等莫悲叹	诸佛法应尔
我入于涅槃	已经无量劫
常受最胜乐	永处安隐处
汝今至心听	我当说涅槃
我已离食想	终无饥渴患
今当为汝等	说其随顺愿
令诸一切众	咸得安隐乐
汝闻应修行	诸佛法常住
假使乌与泉	同共一树栖
犹如亲兄弟	尔乃永涅槃
如来视一切	犹如罗睺罗
常为众生尊	云何永涅槃
假使蛇鼠狼	同处于一穴 <sup>6</sup>
相爱如兄弟	尔乃永涅槃

<sup>6</sup> 大正藏：同处一穴游

如来视一切 犹如罗睺罗  
常为众生尊 云何永涅槃  
假使七叶华 转为婆师香  
迦留为镇头 尔乃永涅槃  
如来视一切 犹如罗睺罗  
云何舍慈悲 永入于涅槃  
假使一阐提 现身成佛道  
永处第一乐 尔乃入涅槃  
如来视一切 皆如罗睺罗  
云何舍慈悲 永入于涅槃  
假使一切众 一时成佛道  
远离诸过患 尔乃入涅槃  
如来视一切 皆如罗睺罗  
云何舍慈悲 永入于涅槃  
假使蠡蛄<sup>7</sup>水 浸坏于大地  
川谷海盈满 尔乃入涅槃  
悲心视一切 皆如罗睺罗  
常为众生尊 云何永涅槃  
以是故汝等 应深乐正法  
不应生忧恼 号泣而啼哭  
若欲自正行 应修如来常

<sup>7</sup> 大正藏：蚊蚋



当观如是法 长存不变易  
复应生是念 三宝皆常住  
是则获大护 如咒枯生果  
是名为三宝 四众应善听  
闻已应欢喜 即发菩提心  
若能计三宝 常住同真谛  
此则是诸佛 最上之誓愿

“若有比丘、比丘尼、优婆塞、优婆夷能以如来最上誓愿而发愿者，当知是人，无有愚痴，堪受供养。以此愿力功德果报，于世最胜，如阿罗汉。若有不能如是观了三宝常者，是旃陀罗。若有能知三宝<sup>8</sup>常住实法因缘，离苦安乐，无有娆害能留难者。”

尔时，人天大众、阿修罗等，闻是法已，心生欢喜，踊跃无量。其心调柔，善灭诸盖，心无高下，威仪<sup>9</sup>清净，颜貌怡悦，知佛常住。是故施設诸天供养，散种种华、末香、涂香，鼓天妓<sup>10</sup>乐，以供养佛。

尔时，佛告迦叶菩萨言：“善男子，汝见是众希有事不？”

<sup>8</sup> 大正藏：宝；永乐北藏及龙藏：法

<sup>9</sup> 大正藏：仪；永乐北藏及龙藏：德

<sup>10</sup> 大正藏：伎

迦叶答言：“已见，世尊！见诸如来无量无边不可称计，受诸大众人天所奉饭食供养。又见诸佛大身庄严，所坐之处如一针锋，多众围绕，不相障阂<sup>11</sup>。复见大众悉发誓愿说十三偈。亦知大众各心念言：‘如来今者，独受我供。’假使纯陀所奉饭食，碎如微尘，一尘一佛犹不周遍，以佛神力，悉皆充足一切大众。唯诸菩萨摩訶萨、文殊师利法王子等能知如来<sup>12</sup>希有事耳，悉是如来方便示现。声闻大众及阿修罗等，皆知如来是常住法。”

尔时，世尊告纯陀言：“汝今所见为是希有奇特事不？”

“实尔，世尊！我先所见无量诸佛，三十二相、八十种好庄严其身。今悉见为菩萨摩訶萨，巨身殊异，颜貌无比。唯见佛身譬如药树，为诸菩萨摩訶萨等之所围绕。”

佛告纯陀：“汝先所见无量佛者是我所化，为欲利益一切众生，令得欢喜。如是菩萨摩訶萨等所可修行不可思议，能作无量诸佛之事。纯陀，汝今皆已成就菩萨摩訶萨行，得十住地<sup>13</sup>，菩萨

<sup>11</sup> 大正藏：碍

<sup>12</sup> 大正藏：是

<sup>13</sup> 大正藏：得住十地



所行具足成办。”

迦叶菩萨白佛言：“世尊！如是如是，如佛所说，纯陀所修，成菩萨行，我亦随喜。今者如来，欲为未来无量众生作大明故，说是大乘《大涅槃经》。世尊！一切契经说有余义？无余义耶？”

“善男子，我所说者，亦有余义，亦无余义。”

纯陀白佛言：“世尊！如佛所说：‘所有之物，布施一切，唯可赞叹，无可毁损。’世尊！是义云何？持戒、毁戒，有何差别？”

佛言：“唯除一人，余一切施皆可赞叹。”

纯陀问言：“云何名为唯除一人？”

佛言：“如此经中所说破戒。”

纯陀复言：“我今未解，惟愿说之。”

佛告纯陀言：“破戒者，谓一阐提。其余在所一切布施，皆可赞叹，获大果报。”

纯陀复问：“一阐提者，其义云何？”

佛告纯陀：“若有比丘及比丘尼、优婆塞、优婆夷，发麤恶言诽谤正法，造是重业，永不改悔，心无惭愧，如是等人，名为趣向一阐提道。若犯四重、作五逆罪，自知定犯如是重事，而心初无怖畏惭愧，不肯发露，于佛正法永无护惜建



立之心，毀訾<sup>14</sup>轻贱，言多过咎，如是等人，亦名趣向一阐提道。若复说言：‘无佛、法、僧<sup>15</sup>。’如是等人，亦名趣向一阐提道。唯除如此一阐提辈，施其余者一切赞叹。”

尔时，纯陀复白佛言：“世尊！所言破戒，其义云何？”

佛告纯陀：“若犯四重及五逆罪，诽谤正法，如是等人名为破戒。”

纯陀复问：“如是破戒可拔济不？”

佛告纯陀：“有因缘故，则可拔济。若被法服，犹未舍远，其心常怀惭愧、恐怖，而自考责：‘咄哉！何为犯斯重罪？何其怪哉！造斯苦业。’深自改悔，生护法心，欲建正法：‘有护法者，我当供养。若有读诵大乘典者，我当咨问、受持、读诵。既通利已，复当为他分别广说。’我说是人，不名<sup>16</sup>破戒。何以故？善男子，譬如日出，能除一切尘翳、闇冥；是大涅槃微妙经典出兴于世，亦复如是，能除众生无量劫中，所作众罪。是故，此经说护正法得大果报，拔济破戒。若有毁谤是正法者，能自改悔，还归于法，自念所作

<sup>14</sup> 大正藏：訾

<sup>15</sup> 大正藏：僧；永乐北藏及龙藏：众

<sup>16</sup> 大正藏：为

一切不善，如人自害，心生恐怖、惊惧、惭愧：

‘除此正法，更无救护，是故应当还归正法。’

若能如是如说归依，布施是人得福无量，亦名世间应受供养。若犯如上恶业之罪，若经一月，或十五日，不生归依发露之心。若施是人，果报甚少。犯五逆者亦复如是，能生悔心，内怀惭愧：

‘今我所作不善之业，甚为大苦，我当建立、护持正法。’是则不名五逆罪也。若施是人，得福无量。犯逆罪已，不生护法、归依之心。有施是者，福不足言。

“又，善男子，犯重罪者，汝今谛听，我当为汝分别广说，应生是心：‘谓正法者，即是如来微密之藏。是故，我当护持、建立。’施是人者，得胜果报。

“善男子，譬如女人，怀妊垂产，值国荒乱，远至他土，在一天庙，即便孕育。后闻旧邦安隐丰熟，携持其子，欲还本土，路经恒河，水长<sup>17</sup>暴急，荷负是儿，不能得度<sup>18</sup>。即自念言：‘我宁与子一处并<sup>19</sup>命，终不舍弃而独济也。’作是念已，与子俱没。命终之后，寻生天中，以慈念故<sup>20</sup>，

<sup>17</sup> 大正藏：涨

<sup>18</sup> 大正藏：渡

<sup>19</sup> 大正藏：并

<sup>20</sup> 大正藏：子



欲令得度。而是女人本性弊恶，以爱子故得生天中。犯四重禁、五无间罪生护法心，亦复如是，虽复先为不善之业，以护法故，得为世间无上福田。是护法者，有如是等无量果报。”

纯陀复言：“世尊！若一阐提能自改悔，恭敬、供养、赞叹三宝，施如是人，得大果报不<sup>21</sup>？”

佛言：“善男子，汝今不应作如是说。善男子，譬如有人，食菴罗果，吐核置地，而复念言：‘是果核中，应有甘味。’即便<sup>22</sup>还取，破而尝之，其味极苦，心生悔恨，恐失果种，即还收拾，种之于地，勤加修治，以苏油乳随时溉灌。于意云何？宁可生不？”

“不也。世尊！假使天降无上甘雨，犹亦不生。”

“善男子，彼一阐提亦复如是，烧灭善根，当于何所而得除罪？善男子，若生善心，是则不名一阐提也。善男子，以是义故，一切所施所得果报非无差别。何以故？施诸声闻所得报异，施辟支佛得报亦异，唯施如来获无上果。是故说言一切所施非无差别。”

<sup>21</sup> 大正藏：得大果不

<sup>22</sup> 大正藏：复



纯陀复言：“何故如来而说此偈？”

佛告纯陀：“有因缘故，我说此偈。王舍城中有优婆塞，心无净信，奉事尼捷<sup>23</sup>，而来问我布施之义，以是因缘，故说斯偈，亦为菩萨摩訶萨等说秘藏义。如斯偈者，其义云何？一切者，少分一切。当知菩萨摩訶萨，人中之雄，摄取持戒，施其所须，舍弃破戒，如除稊稗。

“复次，善男子，如我昔日所说偈言：

一切江河 必有回曲

一切丛林 必名树木

一切女人 必怀谄曲

一切自在 必受安乐

尔时，文殊师利菩萨摩訶萨，即从座起，偏袒右臂，右膝著地，前礼佛足，而说偈言：

非一切河 必有回曲

非一切林 悉名树木

非一切女 必怀谄曲

一切自在 不必受乐

“佛所说偈，其义有余，唯垂哀悯，说其因缘。何以故？世尊！于此三千大千世界有洲名拘耶尼，其洲有河，端直不曲，名娑婆耶，犹如直

<sup>23</sup> 大正藏：捷

绳入于西海。如是河相，于余经中，佛未曾说，惟愿如来，因此方等阿含经中说有余义，令诸菩萨深信解之。世尊！譬如有人，先识金矿，后不识金。如来亦尔，尽知法已，而所演说有余不尽。如来虽作如是余说，应当方便解其意趣。一切丛林必是树木，是亦有余。何以故？种种金、银、琉璃宝树，是亦名林。一切女人必怀谄曲，是亦有余。何以故？亦有女人善持禁戒，功德成就，有大慈悲。一切自在必受安乐，是亦有余。何以故？有自在者，转轮圣帝，如来法王，不属死魔，不可灭尽。梵释诸天虽得自在，悉是无常。若得常住无变易者，乃名自在，所谓大乘大般涅槃。”

佛言：“善男子，汝今善得乐说之辩，且止！谛听！文殊师利，譬如长者，身婴病苦，良医诊之，为合膏药。是时，病者贪欲多服，医语之言：‘若能消者，则可随意，汝今体羸，不应多服。当知是膏，亦名甘露，亦名毒药，若多服不消，则名为毒。’善男子，汝今勿谓是医所说违于义理，损失膏势。善男子，如来亦尔，为诸国王、后妃、太子、王子、大臣，因波斯匿王、王子、后妃憍慢心故，为欲调伏，示现恐怖，如彼良医，故说此偈：



一切江河 必有回曲

一切丛林 必名树木

一切女人 必怀谄曲

一切自在 必受安乐

“文殊师利，汝今当知，如来所说无有漏失，如此大地可令反复，如来之言终无漏失。以是义故，如来所说一切有余。”

尔时，佛赞文殊师利：“善哉！善哉！善男子，汝已久知如是之义，哀悯一切、欲令众生得智慧故，广问如来如是偈义。”

尔时，文殊师利法王子，复于佛前，而说偈言：

于他语言 随顺不逆

亦不观他 作以不作

但自观身 善不善行

“世尊如是说此法药非为正说，于他语言随顺不逆者，惟愿如来垂哀正说。何以故？世尊常说，一切外学九十五种皆趣恶道，声闻弟子皆向正路，若护禁戒，摄持威仪，守慎诸根，如是等人深乐大法，趣向善道。如来何故于九部中，见有毁他，则便呵责？如是偈义，为何所趣？”

佛告文殊师利：“善男子，我说此偈，亦不



尽为一切众生。尔时，唯为阿闍世王。诸佛世尊若无因缘终不逆说，有因缘故乃说之耳。善男子，阿闍世王害其父已，来至我所，欲折伏我，作如是问：‘云何世尊是一切智、非一切智耶？若一切智，调达往昔无量世中，常怀恶心，随逐如来欲为逆害，云何如来听其出家？’善男子，以是因缘，我为是王而说此偈：

于他语言 随顺不逆  
亦不观他 作以不作  
但自观身 善不善行

“佛告大王：‘汝今害父，已作逆罪，最重无间，应当发露，以求清净，何缘乃更见他过咎？’善男子，以是义故，我为彼王而说是偈。

“复次，善男子，亦为护持不毁禁戒成就威仪见他过者而说是偈。若复有人，受他教诲，远离众恶，复教他人，令远众恶，如是之人，则我弟子。”

尔时，世尊为文殊师利复说偈言：

一切畏刀杖 无不爱寿命  
恕己可为譬 勿杀勿行杖

尔时，文殊师利复于佛前而说偈言：

非一切畏杖 非一切爱命

## 恕己可为譬 勤作善方便

“如来说是法句之义亦是未尽。何以故？如阿罗汉、转轮圣王、玉女、象马、主藏大臣，若诸天、人及阿修罗，执持利剑能害之者，无有是处。勇士、烈女、马王、兽王，持戒比丘虽复对至而不恐怖。以是义故，如来说偈亦是有余。若言恕己可为譬者，是亦有余。何以故？若使罗汉以己譬<sup>24</sup>彼，则有我想及以命想。若有我想及以命想，则应拥护。凡夫亦应见阿罗汉悉是行人。若如是者，即是邪见。若有邪见，命终应生阿鼻地狱。又，阿罗汉设于众生生害心者，无有是处；无量众生亦复无能害罗汉者。”

佛言：“善男子，言我想者，谓于众生生大悲心，无杀害想，谓阿罗汉平等之心。勿谓世尊无有因缘而逆说也。昔日于此王舍城中有大猎师，多杀群鹿，请我食肉。我于是<sup>25</sup>时，虽受彼请，于诸众生生慈悲心如罗睺罗，而说偈言：

当令汝长寿 久久住于世  
受持不害法 犹如诸佛寿

“是故，我说此偈：

<sup>24</sup> 大正藏：喻

<sup>25</sup> 大正藏：尔



一切畏刀杖 无不爱寿命

恕己可为譬 勿杀勿行杖

佛言：“善哉！善哉！文殊师利，为诸菩萨摩訶萨故，咨问如来如是密教。”

尔时，文殊师利复说是偈：

云何敬父母 随顺而尊重

云何修此法 堕于无间狱

于是，如来复以偈答：

若以贪爱母 无明以为父

随顺尊重是 则堕无间狱

尔时，如来复为文殊师利重说偈言：

一切属他 则名为苦

一切由己 自在安乐

一切憍慢 势极暴恶

贤善之人 一切爱念

尔时，文殊师利菩萨摩訶萨白佛言：“世尊！如来所说是亦不尽，惟愿如来复垂哀悯，说其因缘。何以故？如长者子，从师学时，为属师不？若属师者，义不成就；若不属者，亦不成就；若得自在，亦不成就。是故，如来所说有余。复次，世尊！譬如王子，无所综习，触事不成，是亦自在、愚闇、常苦。如是王子若言自在，义亦不成；



若言属他，义亦不成。以是义故，佛所说义，名为有余。是故，一切属他，不必受苦；一切自在，不必受乐。一切憍慢，势极暴恶，是亦有余。世尊！如诸烈<sup>26</sup>女，憍慢心故，出家学道，护持禁戒，威仪成就，守摄诸根，不令驰散。是故，一切憍慢之结不必暴恶。贤善之人，一切爱念，是亦有余。如人内犯四重禁已，不舍法服，坚持威仪，护持法者见已不爱，是人命终必堕地狱。若有善人犯重禁已，护持法者见即驱出，罢道还俗。以是义故，一切贤善不必悉爱。”

尔时，佛告文殊师利：“有因缘故，如来于此说有余义。又有因缘，诸佛如来而说是法。时，王舍城有一女人，名曰善贤，还父母家，因至我所，归依于我及法、众僧，而作是言：‘一切女人，势不自由；一切男子，自在无阂<sup>27</sup>。’我于是<sup>28</sup>时，知是女心，即为宣说如是偈颂。文殊师利，善哉！善哉！汝今能为一切众生，问于如来如是密语。”

文殊师利复说偈言：

一切诸众生 皆依饮食存

<sup>26</sup> 大正藏：列

<sup>27</sup> 大正藏：碍

<sup>28</sup> 大正藏：尔

一切有大力 其心无嫉妬  
一切因饮食 而得诸病苦  
一切修净行 而得受安乐

“如是，世尊！今受纯陀饮食供养，将无如来有恐怖耶？”

尔时，世尊复为文殊而说偈言：

非一切众生 尽依饮食存  
非一切大力 心皆无嫉妬  
非一切因食 而致诸病苦  
非一切净行 悉得受安乐

“文殊师利，汝若得病，我亦如是应得病苦。何以故？诸阿罗汉及辟支佛、菩萨、如来，实无所食，为欲化彼，示现受用无量众生所施之物，令其具足檀波罗蜜，拔济地狱、畜生、饿鬼。若言如来六年苦行，身羸瘠<sup>29</sup>者，无有是处。诸佛世尊独拔诸有，不同凡夫，云何而得身羸劣耶？诸佛世尊，精勤修习，获金刚身，不同世人危脆之体<sup>30</sup>。我诸弟子亦复如是，不可思议，不依于食。一切大力无嫉妬者，亦有余义。如世间人，终身永无嫉妬之心而无大力。一切病苦因食得者，

<sup>29</sup> 大正藏：瘦

<sup>30</sup> 大正藏：身



亦有余义。亦见有人得客病者，所谓棘<sup>31</sup>刺、刀剑、矛稍<sup>32</sup>。一切净行受安乐者，是亦有余。世间亦有外道之人，修于梵行，多受苦恼。以是义故，如来所说一切有余，是名如来非无因缘而说此偈，有因故说。昔日于此优禅尼国，有婆罗门名羗羗德，来至我所，欲受第四八戒斋法，我于尔时为说此<sup>33</sup>偈。”

尔时，迦叶菩萨白佛言：“世尊！何等名为无余义耶？云何复名一切义乎？”

“善男子，一切者，唯除助道常乐善法，亦<sup>34</sup>名一切，亦名无余。其余诸法，亦名有余，亦名无余，欲令乐法诸善男子知此有余及无余义。”

迦叶菩萨心大欢喜，踊跃无量，前白佛言：“甚奇！世尊！等视众生如罗睺罗。”

尔时，佛赞迦叶菩萨：“善哉！善哉！汝今所见微妙甚深。”

迦叶菩萨白佛言：“世尊！惟愿如来说是大乘大涅槃经所得功德。”

佛告迦叶：“善男子，若有得闻是经名字，所得功德，非诸声闻、辟支佛等所能宣说，唯佛

<sup>31</sup> 大正藏：刺

<sup>32</sup> 大正藏：铦槩

<sup>33</sup> 大正藏：是

<sup>34</sup> 大正藏：是



能知。何以故？不可思议，是佛境界。何况受持、读诵、通利、书写经卷？”

尔时，诸天、世人及阿修罗即于佛前，异口同音而说偈言：

诸佛难思议 法僧亦复然  
是故今劝请 惟愿小停住  
尊者大迦叶 及以阿难等  
二众之眷属 不久须臾至  
并及摩竭主 阿闍世大王  
至心敬信佛 犹故未来此  
惟愿佛世尊 少垂哀悯住  
于此大众中 断我诸疑网

尔时，如来为诸大众而说偈言：

我法最长子 是名大迦叶  
阿难勤精进 能断一切疑  
汝等当谛观 阿难多闻士  
自然当<sup>35</sup>解了 是常及无常  
以是故不应 心怀大忧恼

尔时，大众以种种物供养如来，供养佛已，即发阿耨多罗三藐三菩提心，无量无边恒河沙数诸菩萨等，得住初地。

<sup>35</sup> 大正藏：能

尔时，世尊与文殊师利、迦叶菩萨及与纯陀而受记荊，受记荊已，说如是言：“诸善男子，自修其心，慎莫放逸。我今背疾，举体皆痛。我今欲卧，如彼小儿及常患者。文殊，汝等当为四部广说大法，今以此法付嘱于汝，乃至迦叶、阿难等至，复当付嘱<sup>36</sup>如是正法。”

尔时，如来说是语已，为欲调伏诸众生故，现身有疾，右胁而卧，如彼病人。

## 现病品第十八<sup>37</sup>

尔时，迦叶白佛言<sup>38</sup>：“世尊！如来已免一切诸<sup>39</sup>病，患苦悉除，无复怖畏。世尊！一切众生有四毒箭则为病因。何等为四？贪欲、瞋恚、愚痴、憍慢。若有病因，则有病生，所谓寒<sup>40</sup>热肺病、上气吐逆、肤体瘠瘠、其心闷乱、下痢哆咽<sup>41</sup>、小便淋沥、眼耳疼痛、腹背胀满、颠狂干消、鬼魅所著。如是种种身心诸病，诸佛世尊悉无复有。今日如来何缘顾命文殊师利，而作是言：‘我今背痛，汝等当为大众说法。’有二因缘，则无

<sup>36</sup> 大正藏：复当嘱付

<sup>37</sup> 大正藏：大般涅槃经现病品第十八

<sup>38</sup> 大正藏：迦叶菩萨白佛言

<sup>39</sup> 大正藏：疾

<sup>40</sup> 大正藏：爱

<sup>41</sup> 大正藏：噎



病苦。何等为二？一者，怜悯一切众生；二者，给施病者医药。如来往昔，已于无量万亿劫中，修菩萨道，常行爱语，利益众生，不令苦恼，施诸<sup>42</sup>病者种种医药，何缘于今自言有病？

“世尊！世人有病，或坐或卧不安其处，或索饮食，勅诫家属修治产业。何故如来默然而卧，不教弟子声闻人等尸波罗蜜、诸禅解脱、三摩跋提、修诸正勤？何缘不说如是甚深大乘经典？何故不以无量方便教大迦叶、人中象王、诸大人等，令其不退阿耨多罗三藐三菩提？何故不治诸恶比丘，受畜一切不净物者？

“世尊实无有病，云何默然右胁而卧？诸菩萨等，凡所给施病者医药，所得善根悉施众生，而共回向一切种智，为除众生诸烦恼障、业障、报障。烦恼障者，贪欲、瞋恚、愚痴、忿怒缠盖，焦恼、嫉妬、悭悋、奸诈、谀谄、无惭、无愧，慢、慢慢、不如慢、增上慢、我慢、邪慢、憍慢，放逸贡高，恚恨诤讼，邪命谄媚，诈现异相，以利求利，恶求多求，无有恭敬，不随教诲，亲近恶友，贪利无厌，缠缚难解，欲于恶欲，贪于恶贪，身见、有见及以无见，频申喜睡，欠喏不乐，

<sup>42</sup> 大正藏：疾；永乐北藏及龙藏：诸



贪嗜饮食，其心蕞薶，心缘异相<sup>43</sup>，不善思惟，身口多恶，好喜多语，诸根闇钝，发言多虚，常为欲觉、恚觉、害觉之所覆盖，是名烦恼障。业障者，五无间罪重恶之病。报障者，生在地狱、畜生、饿鬼，诽谤正法及一阐提，是名报障。如是三障名为大病。而诸菩萨于无量劫修菩提时，给施一切疾病医药，常作是愿：‘令诸众生，永断如是三障重病。’

“复次，世尊！菩萨摩訶萨修菩提时，给施一切病者医药，常作是愿：‘愿令众生，永断诸病，得成如来金刚之身。又愿一切无量众生作妙药王，断除一切诸恶重病。愿诸众生得阿伽陀药，以是药力，能除一切无量恶毒。又愿众生于阿耨多罗三藐三菩提无有退转，疾<sup>44</sup>得成就无上佛药，消除一切烦恼毒箭。又愿众生勤修精进，成就如来金刚之心，作微妙药疗治众病，不令有人生诤讼想。亦愿众生作大药树，疗治一切诸恶重病。又愿众生拔出毒箭，得成如来无上光明。又愿众生得入如来智慧大药、微密法藏。’世尊！菩萨如是已于无量百千万亿那由他劫，发是誓愿，令

<sup>43</sup> 大正藏：想

<sup>44</sup> 大正藏：速

诸众生，悉无诸病。何缘如来乃于今日唱言有疾<sup>45</sup>。

“复次，世尊！世有病者，不能坐起、俯仰、进止，<sup>46</sup> 食饮不御，浆水不下，亦复不能教诫诸子修治家业。尔时，父母、妻子、兄弟、亲属、知识，皆于是人生必死想。世尊！如来今日亦复如是，右胁而卧，无所论说。此阎浮提一切<sup>47</sup> 愚人当作是念：‘如来正觉，必当涅槃。’生灭尽想。而如来性实不毕竟入于涅槃。何以故？如来常住，无变易故。以是因缘，不应说言：‘我今背痛。’”

“复次，世尊！世有病者，身体羸损，若偃若侧，卧著床褥。尔时，众人心生恶贱，起必死想。如来今者，亦复如是，当为外道九十五种之所轻慢、生无常想。彼诸外道，当作是言：‘不如我等，以我性人、自在时节、微尘等法而为常住，无有变易。沙门瞿昙无常所迁，是变易法。’以是义故，世尊！今日不应默然右胁而卧。”

“复次，世尊！世有病者，四大增损，互不调适，羸瘦乏极。是故，不能随意坐起，卧著床褥。如来四大，无不和适，身力具足，亦无羸损。”

<sup>45</sup> 大正藏：病

<sup>46</sup> 大正藏：饮食

<sup>47</sup> 大正藏：此阎浮提有诸



世尊！如十小牛力不如一大牛力，十大牛力不如一青牛力，十青牛力不如一凡象力，十凡象力不如一野象力，十野象力不如一二牙象力，十二牙象力不如一四牙象力，十四牙象力不如雪山一白象力，十雪山白象力不如一香象力，十香象力不如一青象力，十青象力不如一黄象力，十黄象力不如一赤象力，十赤象力不如一白象力，十白象力不如一山象力，十山象力不如一优钵罗象力，十优钵罗象力不如一拘物头象力，十拘物头象力不如一分陀利象力，十分陀利象力不如人中一力士力，十人中力士力不如一钵建<sup>48</sup>提力，十钵建提力不如一八臂那罗延力，十那罗延力不如十住菩萨一节之力。凡夫身中，节不相到；人中力士，节头相到；钵建提身，诸节相接；那罗延身，节头相钩<sup>49</sup>；十住菩萨，诸节骨解蟠龙相结。是故，菩萨其力最大。世界成时，从金刚际起金刚座，上至道场菩提树下，菩萨坐已，其心即时，逮得十力。如来今者，不应如彼婴孩小儿。婴孩小儿愚痴无智，无所能说，以是义故，随意偃侧，无人讥诃。如来世尊，有大智慧照明一切，人之大

<sup>48</sup> 大正藏：健

<sup>49</sup> 大正藏：拘



龙，具大威德，成就神通，无上仙人，永断疑网，已拔毒箭，进止安详，威仪具足，得无所畏。今者何故右胁而卧，令诸人天悲愁苦恼？”

尔时，迦叶即于佛前，而说偈言：

瞿昙大圣德	愿起演妙法
不应如小儿	病者卧床蓐
调御天人师	倚卧双树间
下愚凡夫见	当言必涅槃
不知方等典	甚深佛所行
不见微密藏	犹盲不见道
唯有诸菩萨	文殊师利等
能解是甚深	譬如善射人
三世诸世尊	大悲为根本
如是大慈悲	今为何所在
若无大悲者	是则不名佛
佛若必涅槃	是则不名常
惟愿无上尊	哀受我等请
利益于众生	摧伏诸外道

尔时，世尊大悲熏心，知诸众生各各所念，将欲随顺，毕竟利益，即从卧起，结加<sup>50</sup>趺坐，颜貌熙怡如融金聚，面目端严犹月盛满，形容清

<sup>50</sup> 大正藏：跏

净无诸垢秽，放大光明充遍虚空。其光大盛过百千日，照于东方、南西北方、四维、上下诸佛世界，惠施众生大智之炬，悉令得灭无明黑闇，令百千亿那由他众生安止不退菩提之心。

尔时，世尊心无疑虑，如师子王，以三十二大人之相、八十种好庄严其身。于其身上一切毛孔，一一毛孔出一莲华。其华微妙，各具千叶，纯真金色，琉璃为茎、金刚为须<sup>51</sup>、玫瑰为台，形大团圆犹如车轮。是诸莲华各出种种杂色光明，青、黄、赤、白、紫、玻瓈色。是诸光明皆悉遍至阿鼻地狱、想地狱、黑绳地狱、众合地狱、叫唤地狱、大叫唤地狱、焦热地狱、大焦热地狱。是八地狱其中众生，常为诸苦之所逼切，所谓烧煮、火炙、斫刺、剝剥，遇斯光已，如是众苦悉灭无余，安隐清凉，快乐无极。是光明中，宣说如来秘密之藏，言：“诸众生皆有佛性。”众生闻已，即便命终，生人天中。乃至八种寒冰地狱，所谓阿波波地狱、阿咤咤地狱、阿罗罗地狱、阿婆婆<sup>52</sup>地狱、优钵罗地狱、波头摩地狱、拘物头地狱、分陀利地狱。是中众生，常为寒苦之所逼

<sup>51</sup> 大正藏：须

<sup>52</sup> 大正藏：阿娑娑



恼，所谓劈<sup>53</sup>裂、身体碎坏、互相残害，遇斯光已，如是等苦，亦灭无余，即得调和，温暖适身。是光明中，亦说如来秘密之藏，言：“诸众生皆有佛性。”众生闻已，即便命终，生人天中。尔时，于此阎浮提界及余世界所有地狱，皆悉空虚，无受罪者，除一阐提。

饿鬼众生，饥渴所逼，以发缠身，于百千岁未曾得闻浆水之名，遇斯光已，饥渴即除。是光明中，亦说如来微密秘藏，言：“诸众生皆有佛性。”众生闻已，即便命终，生天人中<sup>54</sup>，令诸饿鬼，亦悉空虚，除谤大乘方等正典。

畜生众生，互相杀害，共相残食，遇斯光已，恚心悉灭。是光明中，亦说如来秘密之藏，言：“诸众生皆有佛性。”众生闻已，即便命终，生人天中。当尔之时，畜生亦尽，除谤正法。

是一一华各有一佛，圆光一寻，金色晃曜，微妙端严，最上无比，三十二相、八十种好庄严其身。是诸世尊，或有坐者，或有行者，或有卧者，或有住者；或震雷音，或澍洪雨，或放电光，或扇大风，或出烟焰身如聚火<sup>55</sup>，或有<sup>56</sup>示现七宝

<sup>53</sup> 大正藏：擘

<sup>54</sup> 大正藏：生人天中

<sup>55</sup> 大正藏：或出烟焰身如火聚

<sup>56</sup> 大正藏：复

诸山、池泉、河水、山林、树木，或复示现七宝国土、城邑、聚落、宫殿、屋宅，或复示现象、马、师子、虎、狼、孔雀、凤凰、诸鸟，或复示现令阎浮提所有众生，悉见地狱、畜生、饿鬼，或复示现欲界六天；复有世尊或说阴、界、诸入多诸过患，或复有说四圣谛法，或复有说诸法因缘，或复有说诸业烦恼皆因缘生，或复有说我与无我，或复有说苦、乐二法，或复有说常、无常等，或复有说净与不净；复有世尊为诸菩萨演说所行六波罗蜜，或复有说诸大菩萨所得功德，或复有说诸佛世尊所得功德，或复有说声闻之人所得功德，或复有说随顺一乘，或复有说三乘成道；或有世尊左肋出水、右肋出火，或有示现初生、出家、坐于道场、菩提树下转妙法轮、入于涅槃，或有世尊作师子吼，令此会中有得一果、二果、三果、至第四果，或复有说出离生死无量因缘。

尔时，于此阎浮提中所有众生，遇斯光已，盲者见色，聋者听声，哑者能言，拘躄能行，贫者得财，悭者能施，恚者慈心，不信者信。如是世界无一众生修行恶法，除一阐提。

尔时，一切天、龙、鬼神、乾闥婆、阿修罗、



迦楼罗、紧那罗、摩睺罗伽、罗刹、建<sup>57</sup>陀、忧摩陀、阿婆摩<sup>58</sup>罗、人、非人等，悉共同声唱如是言：“善哉！善哉！无上天尊多所利益。”说是语已，踊跃欢喜，或歌或舞、或身动转，以种种华散佛及僧，所谓天优钵罗华、拘物头华、波头摩华、分陀利华、曼陀罗华、摩诃曼陀罗华、曼殊沙华、摩诃曼殊沙华、散陀那华、摩诃散陀那华、卢脂那华、摩诃卢脂那华、香华、大香华、适意华、大适意华、爱见华、大爱见华、端严华、第一端严华。复散诸香，所谓沈水、多伽楼香、栴檀、郁金、和合杂香、海岸聚香。复以天上宝幢、旛盖、诸天妓乐箏、笛、笙、瑟、箜篌、鼓吹，供养于佛，而说偈言：

我今稽首大精进	无上正觉两足尊
天人大众所不知	唯有瞿昙乃能了
世尊往昔为我故	于无量劫修苦行
如何一旦弃本誓	而便舍命欲涅槃
一切众生不能见	诸佛世尊秘密藏
以是因缘难得出	轮转生死坠恶道
如佛所说阿罗汉	一切皆当至涅槃

<sup>57</sup> 大正藏：健

<sup>58</sup> 大正藏：魔

如是甚深佛行处 凡夫下愚谁能知  
施诸众生甘露法 为断除彼诸烦恼  
若有服此甘露已 不复受生老病死  
如来世尊用<sup>59</sup>疗治 百千无量诸众生  
令其所有诸重病 一切消灭无遗余  
世尊久已舍病苦 故得名为第七佛  
惟愿今日雨法雨 润渍我等功德种  
是诸大众及人天 如是请已默然住

说是偈时，莲华台中一切诸佛，从阎浮提遍至净居，悉皆闻之。

尔时，佛告迦叶菩萨：“善哉！善哉！善男子，汝已具足如是甚深微妙智慧，不为一切诸魔外道之所破坏。善男子，汝已安住，不为一切诸邪恶<sup>60</sup>风之所倾动。善男子，汝已成就乐说辩才，已曾供养过去无量恒河沙等诸佛世尊，是故能问如来正觉如是之义。

“善男子，我于往昔无量无边亿那由他百千万劫已除病根，永离倚卧。迦叶，过去无量阿僧祇劫有佛出世，号无上胜如来、应供、正遍知、明行足、善逝、世间解、无上士、调御丈夫、天

<sup>59</sup> 大正藏：已

<sup>60</sup> 大正藏：恶邪



人师、佛、世尊，为诸声闻说是大乘大涅槃经，开示分别，显发其义。我于尔时，亦为彼佛而作声闻，受持如是大涅槃典，读诵通利，书写经卷，广为他人开示分别解说其义，以是善根，回向阿耨多罗三藐三菩提。

“善男子，我从是来，未曾有恶烦恼业缘堕于恶道，诽谤正法，作一阐提，受黄门身、无根、二根，反逆父母，杀阿罗汉，破塔坏僧，出佛身血，犯四重禁。从是以<sup>61</sup>来，身心安隐，无诸苦恼。

“迦叶，我今实无一切疾病。所以者何？诸佛世尊久已远离一切病故。迦叶，是诸众生不知大乘方等密语<sup>62</sup>，便谓如来真实有疾。

“迦叶，如言如来人中师子，而如来者，实非师子，如是之言，即是如来秘密之教。迦叶，如言如来人中大龙，而我已于无量劫中，舍离是业。迦叶，如言如来是人是天，而我真实非人非天，亦非鬼、神、乾闥婆、阿修罗、迦楼罗、紧那罗、摩睺罗伽，非我、非命，非可养育、非人、士夫，非作非不作，非受非不受，非世尊非声闻，

<sup>61</sup> 大正藏：已

<sup>62</sup> 大正藏：教

非说非不说，如是等语皆是如来秘密之教。迦叶，如言如来犹如大海、须弥山王，而如来者，实非鹹味、同于石山，当知是语，亦是如来秘密之教。迦叶，如言如来如分陀利，而我实非分陀利也，如是之言，即是如来秘密之教。迦叶，如言如来犹如父母，而如来者，实非父母，如是之言，亦是如来秘密之教。迦叶，如言如来是大船师，而如来者，实非船师，如是之言，亦是如来秘密之教。迦叶，如言如来犹如商主，而如来者，实非商主，如是之言，亦是如来秘密之教。迦叶，如言如来能摧伏魔，而如来者，实无恶心欲令他伏，如是之言，皆是如来秘密之教。迦叶，如言如来能治痈疮，而我实非治痈疮师，如是之言，亦是如来秘密之教。迦叶，如我先说：‘若有善男子、善女人，善能修治身、口、意业，舍命之时，虽有亲族取其尸骸，或以火烧，或投大水，或弃冢间，狐、狼、禽兽竞共食啖，然心意识即生善道，而是心法实无去来，亦无所至，直是前后相似相续，相貌不异。’如是之言，即是如来秘密之教。

“迦叶，我今言病亦复如是，亦是如来秘密之教。是故，顾命文殊师利：‘吾今背痛，汝等当为四众说法。’



“迦叶，如来正觉实无有病，右胁而卧，亦不毕竟入于涅槃。迦叶，是大涅槃即是诸佛甚深禅定，如是禅定，非是声闻、缘觉行处。

“迦叶，汝先<sup>63</sup>所问：‘如来何故倚卧不起、不索饮食、诫勅家属修治产业？’迦叶，虚空之性亦无坐起、求索饮食、勅诫家属修治产业，亦无去来、生灭老壮、出没伤破、解脱系缚，亦不自说，亦不说他，亦不自解，亦不解他，非安非病。善男子，诸佛世尊亦复如是，犹如虚空，云何当有诸病苦耶？

“迦叶，世有三人，其病难治：一，谤大乘；二，五逆罪；三，一阐提。如是三病，世中极重，悉非声闻、缘觉之所能治。善男子，譬如有病，必死无<sup>64</sup>治，若有瞻病随意医药，若无瞻病随意医药，如是之病，定不可治，当知是人，必死无<sup>65</sup>疑。是三种人亦复如是，若有声闻、缘觉、菩萨，或有说法，或不说法，不能令其发阿耨多罗三藐三菩提心。

“迦叶，譬如病人，若有瞻病随意医药则可令差，若无此三，则不可差。声闻、缘觉亦复如

<sup>63</sup> 大正藏：先；永乐北藏及龙藏：上

<sup>64</sup> 大正藏：难

<sup>65</sup> 大正藏：不

是，从佛菩萨得闻法已，即便能发阿耨多罗三藐三菩提心，非不闻法能发心也。

“迦叶，譬如病人，若有瞻病随意医药，若无瞻病随意医药，皆悉可差。有一种人亦复如是，或值声闻、不值声闻，或值缘觉、不值缘觉，或值菩萨、不值菩萨，或值如来、不值如来，或得闻法、不得闻法<sup>66</sup>，自然得成阿耨多罗三藐三菩提。所谓有人，或为自身，或为他身，或为怖畏，或为利养，或为谄谀，或为诳他，书写如是大涅槃经，受持读诵，供养恭敬，为他说者。

“迦叶，有五种人于是大乘大涅槃典有病行处，非如来也。何等为五？一，断三结得须陀洹果，不堕地狱、畜生、饿鬼，人天七反<sup>67</sup>，永断诸苦，入于涅槃。迦叶，是名第一有病行处。是人未来过八万劫，便当得成阿耨多罗三藐三菩提。

“迦叶，第二人者，断三结缚，薄贪、恚、痴，得斯陀含果，一往来，永断诸苦，入于涅槃。迦叶，是名第二有病行处。是人未来过六万劫，便当得成阿耨多罗三藐三菩提。

“迦叶，第三人者，断五下结，得阿那含果，

<sup>66</sup> 大正藏：或不闻法

<sup>67</sup> 大正藏：返



更不来此，永断诸苦，入于涅槃。是名第三有病行处。是人未来过四万劫，便当得成阿耨多罗三藐三菩提。

“迦叶，第四人者，永断贪欲、瞋恚、愚痴，得阿罗汉果，烦恼无余，入于涅槃，亦非麒麟独一无二之行。是名第四人有病行处。是人过二万劫，便当得成阿耨多罗三藐三菩提。

“迦叶，第五人者，永断贪欲、瞋恚、愚痴，得辟支佛道，烦恼无余，入于涅槃，真是麒麟独一无二之行。是名第五人有病行处。是人未来过十千劫，便当得成阿耨多罗三藐三菩提。

“迦叶，是名第五人有病行处，非如来也。”

大般涅槃经卷第十

# 大般涅槃經卷第十一

北凉天竺三藏昙无讖译 梵

宋沙门慧严慧观同谢灵运再治

## 圣行品第十九之一

尔时，佛告迦叶菩萨：“善男子，菩萨摩訶萨，应当于是大般涅槃经<sup>68</sup>，专心思惟五种之行。何等为五？一者，圣行；二者，梵行；三者，天行；四者，婴儿行；五者，病行。善男子，菩萨摩訶萨常当修习是五种行。复有一行是如来行，所谓大乘大涅槃经。

“迦叶，云何菩萨摩訶萨所修圣行？菩萨摩訶萨若从声闻、若从如来得闻如是大涅槃经，闻已生信，信已应作如是思惟：‘诸佛世尊有无上道，有大正法，大众正行，复有方等大乘经典。我今当为爱乐贪求大乘经故，舍离所爱妻子眷属、所居舍宅、金银珍宝、微妙璎珞、香华妓<sup>69</sup>乐、奴仆给使、男女大小、象马车乘、牛羊鸡犬猪豕之属。’复作是念：‘居家逼迫犹如牢狱，一切烦

<sup>68</sup> 大正藏：应当于是般涅槃经

<sup>69</sup> 大正藏：伎



恼由之而生。出家闲旷犹如虚空，一切善法因之增长。若在家居，不得尽寿净修梵行，我今应当剃除须<sup>70</sup>发，出家学道。’复作是念：‘我今定当出家修学无上正真菩提之道。’菩萨如是欲出家时，天魔波旬生大苦恼言：‘是菩萨复当与我兴大战争。’

“善男子，如是菩萨云何当复与人战争？是时，菩萨即至僧坊，若见如来及佛弟子威仪具足，诸根寂静，其心柔和，清净寂灭，即至其所而求出家，剃除须发，服三法衣。既出家已，奉持禁戒，威仪不缺，进止安庠<sup>71</sup>，无所触犯，乃至小罪心生怖畏，护戒之心犹如金刚。

“善男子，譬如有人，带持浮囊欲度<sup>72</sup>大海。尔时，海中有一罗刹，即从此人乞索浮囊。其人闻已，即作是念：‘我今若与，必定没死。’答言：‘罗刹，汝宁杀我，浮囊叵得。’罗刹复言：‘汝若不能全与我者，见惠其半。’是人犹故不肯与之。罗刹复言：‘汝若不能惠我半者，幸愿与我三分之一。’是不肯。罗刹复言：‘若不能者，施我手许。’是不肯。罗刹复言：‘汝今若复不

<sup>70</sup> 大正藏：鬢

<sup>71</sup> 大正藏：祥

<sup>72</sup> 大正藏：渡

能与我如手许者，我今饥穷，众苦所逼，愿当济我如微尘许。’是人复言：‘汝今所索，诚复不多，然我今日，方当度<sup>73</sup>海，不知前途<sup>74</sup>近远云<sup>75</sup>何。若与汝者，气当渐出，大海之难，何由得过脱能<sup>76</sup>？中路没水而死。’

“善男子，菩萨护持禁戒亦复如是，如彼度人护惜浮囊。菩萨如是守护戒时，常有烦恼诸恶罗刹语菩萨言：‘汝当信我，终不相欺。但破四禁，护持余戒，以是因缘，令汝安隐，得入涅槃。’菩萨尔时，应作是言：‘我今宁持如是禁戒堕阿鼻狱，终不毁犯而生天上。’烦恼罗刹复作是言：‘汝若不能破四禁者，可破僧残。以是因缘，令汝安隐，得入涅槃。’菩萨亦应不随其语。罗刹复言：‘汝<sup>77</sup>若不能犯僧残者，亦可故犯偷兰遮罪。以是因缘，令汝安隐，得入涅槃。’菩萨尔时，亦复不随。罗刹复言：‘汝若不能犯偷兰遮，可犯舍堕。以是因缘，可得安隐，入于涅槃。’菩萨尔时，亦复不随。罗刹复言：‘汝若不能犯舍堕者，可破波夜提。以是因缘，令汝安隐，得入

<sup>73</sup> 大正藏：渡

<sup>74</sup> 大正藏：道

<sup>75</sup> 大正藏：如

<sup>76</sup> 大正藏：能脱

<sup>77</sup> 大正藏：卿



涅槃。’ 菩萨尔时，亦复不随。罗刹复言：‘汝若不能犯波夜提者，幸可毁破突吉罗戒。以是因缘，可得安隐，入于涅槃。’ 菩萨尔时，心自念言：

‘我今若犯突吉罗罪不发露者，则不能度生死彼岸而得涅槃。’ 菩萨摩訶萨，于是微小诸戒律中，护持坚固，心如金刚。

“菩萨摩訶萨持四重禁及突吉罗，敬重坚固，等无差别。菩萨若能如是坚持，则为具足五支诸戒，所谓具足菩萨根本业清净戒、前后眷属余清净戒、非诸恶觉觉清净戒、护持正念念清净戒、回向阿耨多罗三藐三菩提戒。

“迦叶，是菩萨摩訶萨复有二种戒：一者，受世教戒；二者，得正法戒。菩萨若得正法戒者，终不为恶。受世戒者，白四羯磨然后乃得。

“复次，善男子，有二种戒：一者，性重戒；二者，息世讥嫌戒。性重戒者，谓四禁也。息世讥嫌戒者，不作贩卖轻称<sup>78</sup>小斗欺诳于人、因他形势取人财物、害心系缚、破坏成功、燃明而卧、田宅种植、家业坐肆。不畜象马车乘、牛、羊、驼、驴、鸡、犬、猕猴、孔雀、鹦鹉、共命，及拘积罗、豺、狼、虎、豹、猫、狸、猪、豕，及

<sup>78</sup> 大正藏：秤

余恶兽、童男、童女、大男、大女、奴婢、僮仆、金、银、琉璃、玻瓈、真珠、砗磲、码碯、珊瑚、璧玉、珂贝、诸宝、赤铜、白鐵、鍮石、盂器、毳毼<sup>79</sup>、毳毼<sup>80</sup>、拘执茸<sup>81</sup>衣、一切谷米、大小麦豆、黍、粟、稻、麻、生熟餐具。常受一食，未<sup>82</sup>曾再食。若行乞食及僧中食，常知止足，不受别请。不食肉，不饮酒，五辛荤物悉不食之，是故其身无有臭秽，常为诸天、一切世人恭敬供养，尊重赞叹。趣足而食，终不长受。所受衣服，才足覆身。进止常与三衣钵具，终不舍离，如鸟二翼。不畜根子、茎子、节子、薹<sup>83</sup>子、子子，不畜库<sup>84</sup>藏若金若银、饮食厨库、衣裳服饰。高广大床、象牙金床、杂色编织，悉不坐卧。不畜一切细软诸席，不坐一切象荐、马荐，不以细软上妙衣裳<sup>85</sup>用敷床卧。其止息床不置二枕，亦不受畜妙好丹枕、安簧<sup>86</sup>木枕。终不观视象斗、马斗、车斗、兵斗、若男、若女、牛、羊、鸡、雉、鸚鵡等斗，亦不故往观视军阵；亦不故听吹贝、鼓、

<sup>79</sup> 大正藏：毳毼

<sup>80</sup> 大正藏：毳毼

<sup>81</sup> 大正藏：蕢

<sup>82</sup> 大正藏：不

<sup>83</sup> 大正藏：接

<sup>84</sup> 大正藏：宝

<sup>85</sup> 大正藏：服

<sup>86</sup> 大正藏：黄



角、琴、瑟、箏、笛、箜篌、歌叫、妓乐之声，除供养佛；樗<sup>87</sup>蒲、围棋<sup>88</sup>、波罗塞戏、师子、象斗、弹碁、六博、拍毬、掷石、投壶、牵道、八道行成，一切戏笑悉不观作。终不占<sup>89</sup>相手、足、面目，不以爪镜、蓍<sup>90</sup>草、杨枝、钵盂、髑髅而作卜筮，亦不仰观虚空星宿，除欲解睡；不作王家往返使命，以此语彼，以彼语此，终不谀谄邪命自活，亦不宣说王臣、盗贼、斗争、饮食、国土饥馑恐怖、丰乐安隐之事。

“善男子，是名菩萨摩訶萨息世讥嫌戒。

“善男子，菩萨摩訶萨坚持如是遮制之戒，与性重戒等无差别。

“善男子，菩萨摩訶萨受持如是诸禁戒已，作是愿言：‘宁以此身，投于炽然猛火深坑，终不毁犯过去、未来、现在诸佛所制禁戒，与刹利、婆罗门、居士等女而行不净。’复次，善男子，菩萨摩訶萨复作是愿：‘宁以热铁周帀缠身，终不敢以破戒之身而受信心檀越衣服。’复次，善男子，菩萨摩訶萨复作是愿：‘宁以此口吞热铁丸，终不敢以毁戒之口而食信心檀越饮食。’复

<sup>87</sup> 大正藏：樗

<sup>88</sup> 大正藏：碁

<sup>89</sup> 大正藏：瞻

<sup>90</sup> 大正藏：芝

次，善男子，菩薩摩訶薩復作是愿：‘宁卧此身大热铁上，终不敢以破戒之身受信心檀越床卧敷具。’复次，善男子，菩薩摩訶薩復作是愿：‘宁以此身受三百矛<sup>91</sup>，终不敢以毁戒之身而受信心檀越医药。’复次，善男子，菩薩摩訶薩復作是愿：‘宁以此身投热铁镬，终不敢以破戒之身受信心檀越房舍、屋宅。’复次，善男子，菩薩摩訶薩復作是愿：‘宁以铁椎打碎此身，从头至足令如微尘，不以破戒之身受<sup>92</sup>诸刹<sup>93</sup>利、婆罗门、居士恭敬礼拜。’复次，善男子，菩薩摩訶薩復作是愿：‘宁以热铁挑其两目，不以染心视他好色。’复次，善男子，菩薩摩訶薩復作是愿：‘宁以铁锥周遍刺耳<sup>94</sup>，不以染心听好音声。’复次，善男子，菩薩摩訶薩復作是愿：‘宁以利刀割去其鼻，不以染心贪嗅诸香。’复次，善男子，菩薩摩訶薩復作是愿：‘宁以利刀割裂其舌，不以染心贪著美味。’复次，善男子，菩薩摩訶薩復作是愿：‘宁以利斧斩破<sup>95</sup>其身，不以染心贪著诸触。’何以故？以是因缘能令行者堕于地狱、畜

<sup>91</sup> 大正藏：铦

<sup>92</sup> 大正藏：不以破戒受；永乐北藏及龙藏：不以破戒之身受

<sup>93</sup> 大正藏：刹；永乐北藏：利；龙藏：刹

<sup>94</sup> 大正藏：身

<sup>95</sup> 大正藏：斫



生、饿鬼。

“迦叶，是名菩萨摩诃萨护持禁戒。

“菩萨摩诃萨护持如是诸禁戒已，悉以施与一切众生，以是因缘，愿令众生护持禁戒，得清净戒、善戒、不缺戒、不析戒、大乘戒、不退戒、随顺戒、毕竟戒、具足成就波罗蜜戒。

“善男子，菩萨摩诃萨修持如是清净戒时，即得住于初不动地。云何名为不动地？菩萨住是不动地中，不动不堕，不退不散。善男子，譬如须弥山，随蓝猛风不能令动、堕落、退散。菩萨摩诃萨住是地中，亦复如是，不为色、声、香、味所动，不堕地狱、畜生、饿鬼，不退声闻、辟支佛地，不为异见邪风所散而作邪命。复次，善男子，又，不动者，不为贪欲、恚、痴所动。又，不堕者，不堕四重。又，不退者，不退戒还家<sup>96</sup>。又，不散者，不为违逆大乘经者之所散坏。复次，菩萨摩诃萨亦复不为诸烦恼魔之所倾动，不为阴魔所堕，乃至坐于道场菩提树下，虽有天魔，不能令其退阿耨多罗三藐三菩提，亦复不为死魔所散。善男子，是名菩萨修习圣行。

“善男子，云何名为圣行？圣行者，佛及菩

<sup>96</sup> 大正藏：不退还家

萨之所行故，故名圣行。以何等故名佛菩萨为圣人耶？如是等人有圣法故，常观诸法性空寂故。以是义故，故名圣人。有圣戒故，故名圣人；有圣定、慧故，故名圣人；有七圣财，所谓信、戒、惭、愧、多闻、智慧、舍离故，故名圣人；有七圣觉故，故名圣人。以是义故，复名圣行。

“复次，善男子，菩萨摩訶萨圣行者，观察是身从头至足，其中唯有发毛爪齿、不净垢秽、皮肉筋骨、脾肾心肺、肝胆肠胃、生熟二脏<sup>97</sup>、大小便利、涕唾目泪、肪膏脑膜、骨髓脓血、脑脉<sup>98</sup>诸脉。菩萨如是专念观时，：‘谁有是我？我为属谁？住在何处？谁属于我？’复作是念：‘骨是我耶？离骨是乎<sup>99</sup>？’菩萨尔时，除去皮肉，唯观白骨，复作是念：‘骨色相异，所谓青、黄、白色、鸽色，如是骨相亦复非我。何以故？我者亦非青、黄、白色，及以鸽色。’菩萨系心作是观时，即得断除一切色欲。

“复作是念：‘如是骨者从因缘生。依因足骨以拄踝骨，依因踝骨以拄踇骨，依因踇骨以拄膝骨，依因膝骨以拄髀骨，依因髀骨以拄臑骨，

<sup>97</sup> 大正藏：藏

<sup>98</sup> 大正藏：骸

<sup>99</sup> 大正藏：耶



依因臑骨以拄腰骨，依因腰骨以拄脊骨，依因脊骨以拄肋骨；复因脊骨上拄项骨，依因项骨以拄颌骨，依因颌骨以拄牙齿，上有髑髅；复因项骨以拄肩骨，依因肩骨以拄臂骨，依因臂骨以拄腕骨，依因腕骨以拄掌骨，依因掌骨以拄指骨。’  
菩萨摩訶萨如是观时，身所有骨一切分离。得是观已，即断三欲：一，形貌欲；二，姿态欲；三，细触欲。

“菩萨摩訶萨观青骨时，见此大地，东西南北，四维上下，悉皆青相。如青色观，黄、白、鸽色亦<sup>100</sup>复如是。菩萨摩訶萨作是观时，眉间即出青、黄、赤、白、鸽等色光。菩萨于是一一诸光明中见有佛像，见已即问：‘如此身者，不净因缘和合共成，云何而得坐起行住、屈伸俯仰、视瞬喘息、悲泣喜笑？此中无主，谁使之尔？’作是问已，光中诸佛忽然不现。复作是念：‘或识是我，故使诸佛不为我说。’复观此识，次第生灭犹如流水，亦复非我。复作是念：‘若识非我，出息、入息或能是我。’复作是念：‘此<sup>101</sup>出、入息直是风性，而是风性乃是四大，四大之中，

<sup>100</sup> 大正藏：亦；永乐北藏：亦；龙藏：不

<sup>101</sup> 大正藏：是

何者是我？地性非我，水、火、风性亦复非我。’复作是念：‘此身一切悉无有我，唯有心风因缘和合，示现种种所作事业，譬如呪力、幻术所作，亦如箜篌随意出声。是故，此身如是不净，假众因缘和合共成，当于何处而生贪欲？若彼<sup>102</sup>骂辱，复于何处而生瞋恚？如我此身三十六物不净、臭秽，何处当有受骂辱者？’若闻其骂，即便思惟：‘以何音声而见骂耶？一一音声不能见骂，若一不能，众多亦尔，以是义故，不应生瞋。’若他来打，亦应思惟：‘如是打者，从何而生？’复作是念：‘因手、刀、杖及以我身故得名打。我今何缘横瞋于他？乃是我身自招此咎，以我受是五阴身故。譬如因的则有箭中，我身亦尔，有身有打。我若不忍，心则散乱；心若散乱，则失正念；若失正念，则不能观善不善义；若不能观善不善义，则行恶法；恶法因缘则堕地狱、畜生、饿鬼。’菩萨尔时作是观已，得四念处。得四念处已，则得住于堪忍地中。菩萨摩訶萨住是地已，则能堪忍贪欲、恚、痴，亦能堪忍寒热饥渴、蚊虻蚤虱、暴风恶触、种种疾疫、恶口骂詈、挝打楚撻，身心苦恼一切能忍，是故名为住堪忍地。’’

<sup>102</sup> 大正藏：被



迦叶菩萨白佛言：“世尊！菩萨未得住不动地，净持戒时，颇有因缘得破戒不？”

“善男子，菩萨未得住不动地，有因缘故可得破戒。”

迦叶言：“唯然，世尊！何者是耶？”

佛告迦叶：“若有菩萨，知以破戒因缘，则能令人受持爱乐大乘经典，又能令其读诵、通利、书写经卷、广为人<sup>103</sup>说、不退转于阿耨多罗三藐三菩提，为如是故，故得破戒。菩萨尔时，应作是念：‘我宁一劫若减一劫堕阿鼻地狱受此罪报，要令是人<sup>103</sup>不退转于阿耨多罗三藐三菩提。’迦叶，以是因缘，菩萨摩訶萨得毁净戒。”

尔时，文殊师利菩萨白佛言：“世尊！若有菩萨摄取护持如是之人，令不退转菩提之心，为是毁戒，若堕阿鼻地狱，无有是处。”

尔时，佛赞文殊师利：“善哉！善哉！如汝所说。我念往昔于阎浮提作大国王，名曰仙豫<sup>104</sup>，爱念敬重大乘经典，其心纯善，无有粗恶、嫉妬、悭吝，口常宣说爱语、善语，身常摄护贫穷、孤独，布施、精进无有休废。时世无佛、声闻、缘

<sup>103</sup> 大正藏：他

<sup>104</sup> 大正藏：预

觉。我于尔时，爱乐大乘方等经典，十二年中事婆罗门，供给所须。过十二年施安已讫，即作是言：‘师等今应发阿耨多罗三藐三菩提心。’婆罗门言：‘大王，菩提之性是无所有，大乘经典亦复如是。大王云何乃欲令人同于虚空？’善男子，我于尔时，心重大乘，闻婆罗门诽谤方等，闻已即时断其命根。善男子，以是因缘，从是已来不堕地狱。善男子，拥护、摄持大乘经典，乃有如是无量势力。

“复次，迦叶，又有圣行，所谓四圣谛，苦、集、灭、道。迦叶，苦者，逼迫相；集者，能生长相；灭者，寂灭相；道者，大乘相。复次，善男子，苦者，现相；集者，转相；灭者，除相；道者，能除相。复次，善男子，苦者有三相：苦苦相、行苦相、坏苦相；集者，二十五有；灭者，灭二十五有；道者，修戒、定、慧。

“复次，善男子，有漏法者有二种，有因有果；无漏法者亦有二种，有因有果。有漏果者，是则名苦；有漏因者，则名为集；无漏果者，则名为灭；无漏因者，则名为道。

“复次，善男子，八相名苦，所谓生苦、老苦、病苦、死苦、爱别离苦、怨憎会苦、求不得



苦、五盛阴苦；能生如是八苦法者，是名为集；无有如是八苦<sup>105</sup>之处，是名为灭；十力、四无所畏、三念处、大悲，是名为道。

“善男子，生者出相，所谓五种：一者，初出；二者，至终；三者，增长；四者，出胎；五者，种类生。

“何等为老？老有二种：一，念念老；二，终身老。复有二种：一，增长老；二，灭坏老。是名为老。

“云何为病？病谓四大毒蛇互不调适，亦有二种：一者，身病；二者，心病。身病有五：一者，因水；二者，因风；三者，因热；四者，杂病；五者，客病。客病有四：一者，非分强作；二者，忘误堕落；三者，刀杖瓦石；四者，鬼魅所著。心病亦有四种：一者，踊跃；二者，恐怖；三者，忧愁；四者，愚痴。复次，善男子，身心之病凡有三种。何等为三？一者，业报；二者，不得远离恶对；三者，时节代谢。生如是等因缘、名字、受分别病。因缘者，风等诸病；名字者，心闷肺胀、上气嗽逆、心惊下痢；受分别者，头痛、目痛、手足等痛。是名为病。

<sup>105</sup> 大正藏：法

“何等為死？死者，舍所受身。舍所受身亦有二種：一，命盡死；二，外緣死。命盡死者亦有三種：一者，命盡非是福盡；二者，福盡非是命盡；三者，福命俱盡。外緣死者亦有三種：一者，非分自害死；二者，橫為他死；三者，俱死。又有三種死：一，放逸死；二，破戒死；三，壞命根死。何等名為放逸死？若有誹謗大乘方等般若波羅蜜，是名放逸死。何等名為破戒死？毀犯去、來、現在諸佛所制禁戒，是名破戒死。何等名為壞命根死？舍五陰身，是名壞命根死。如是名曰死為大苦。

“何等名為愛別離苦？所愛之物破壞離散。所愛之物破壞離散亦有二種：一者，人中五陰壞；二者，天中五陰壞。如是人天所受<sup>106</sup>五陰分別校計有無量種，是名愛別離苦。

“何等名為怨憎會苦？所不愛者而共聚集。所不愛者而共聚集亦有三種，所謂地獄、餓鬼、畜生。如是三趣分別校<sup>107</sup>計有無量種，如是則名怨憎會苦。

“何等名為求不得苦？求不得苦亦有二種：

<sup>106</sup> 大正藏：愛

<sup>107</sup> 大正藏：校



一者，所希望处求不能得；二者，多用功力不得果报，如是则名求不得苦。

“何等名为五盛阴苦？五盛阴苦者，生苦、老苦、病苦、死苦、爱别离苦、怨憎会苦、求不得苦，是故名为五盛阴苦。

“迦叶，生之根本，凡有如是七种之苦，老苦乃至五盛阴苦。迦叶，夫衰老者，非一切有。佛及诸天，一向定无；人中不定，或有或无。迦叶，三界受身，无不有生，老不必定，是故一切生为根本。

“迦叶，世间众生颠倒覆心，贪著生相，厌患老死；菩萨不尔，观于初生已见过患。迦叶，如有女人入于他舍。是女端正，颜貌美丽，以好璎珞庄严其身。主人见已，即便问言：‘汝字何等？系属于谁？’女人答言：‘我身即是功德大天。’主人问言：‘汝所至处为何所作？’女天答言：‘我所至处能与种种金、银、琉璃、玻瓈、真珠、珊瑚、琥珀、砗磲、码瑙、象马车乘、奴婢、仆使。’主人闻已，心生欢喜，踊跃无量：

‘我今福德故，令汝来至我舍宅。’即便烧香、散华，供养、恭敬、礼拜。复于门外更见一女，其形丑陋，衣裳弊坏，多诸垢腻，皮肤皴裂，其

色艾白。见已问言：‘汝字何等？系属于谁？’  
女人答言：‘我字黑闇。’复问：‘何故名为黑闇？’  
女人答言：‘我所行处，能令其家所有财宝一切衰耗。’主人闻已，即持利刀作如是言：‘汝若不去，当断汝命。’女人答言：‘汝甚愚痴，无有智慧。’主人问言：‘何故名我痴无智慧？’女人答言：‘汝家中者，即是我姊，我常与姊，进止共俱。汝若驱我，亦当驱彼<sup>108</sup>。’主人还入，问功德天：‘外有一女，云是汝妹，实为是不？’功德天言：‘实是我妹，我与此妹，行住共俱，未曾相离。随所住处，我常作好，彼当<sup>109</sup>作恶；我作利益，彼作衰损。若爱我者，亦应爱彼；若见恭敬，亦应敬彼。’主人即言：‘若有如是好恶事者，我皆不用，各随意去。’是时，二女便共相将还其所止。尔时，主人见其还去，心生欢喜，踊跃无量。是时，二女复共相随至一贫家。贫人见已，心生欢喜，即请之言：‘从今已往，愿汝二人，常住我家。’功德天言：‘我等先以<sup>110</sup>为他所驱，汝复何缘俱请我住？’贫人答言：‘汝今念我，我以汝故，复当敬彼，是故俱请，令住我

<sup>108</sup> 大正藏：姊

<sup>109</sup> 大正藏：常

<sup>110</sup> 大正藏：已



家。’ 迦叶，菩薩摩訶薩亦復如是，不愿生天，以生当有老、病、死故，是以俱弃，曾无受心。凡夫愚人不知老、病、死等过患，是故贪受生死二法。

“复次，迦叶，如婆罗门幼稚童子，为饥所逼，见人粪中有庵罗果，即便取之。有智见已，呵责之言：‘汝婆罗门种姓清净，何故取是粪中秽菓？’ 童子闻已，赧然有愧，即答之言：‘我实不食，为欲洗净还弃舍之。’ 智者语言：‘汝大愚痴，若还弃者，本不应取。’ 善男子，菩薩摩訶薩亦复如是，于此生分不受不舍，如彼智者呵责童子；凡夫之人欣生恶死，如彼童子取菓还弃。

“复次，迦叶，譬如有人，四衢道头器盛满食，色香味具，而欲卖之。有人远来，饥虚羸乏，见其饭食色香味具，即指问言：‘此是何物？’ 食主答言：‘此是上食，色香味具。若食此食，得色、得力、能除饥渴、得见诸天，唯有一患，所谓命终。’ 是人闻已，即作是念：‘我今不用色、力、见天，亦不用死。’ 即作是言：‘食是食已若命终者，汝今何为于此卖之？’ 食主答言：‘有智之人终不肯买，唯有愚人不知是事，多与我价，贪而食之。’ 善男子，菩薩摩訶薩亦复如是，不

愿生天、得色、得力、见于诸天。何以故？以其不免诸苦恼故。凡夫愚痴，随有生处皆悉贪爱，以其不见老、病、死故。

“复次，迦叶<sup>111</sup>，譬如毒树，根能杀人，枝干、茎节、皮叶、华实悉亦能杀。善男子，二十五有受生之处，所受五阴亦复如是，一切能杀。

“复次，迦叶，譬如糞秽，多少俱臭。善男子，生亦如是，设受<sup>112</sup>八万下至十岁，俱亦受苦。

“复次，迦叶，譬如峻岸，上有草覆，于彼岸边，多有甘露，若有食者，寿命<sup>113</sup>千年，永除诸病，安隐快乐。凡夫愚人贪其味故，不知其下有大深坑，即前欲取，不觉脚踏，堕坑而死。智者知己，舍离远去。善男子，菩萨摩訶萨亦复如是，尚不欲受天上妙食，况复人中？凡夫之人乃于地狱吞啖铁丸，况复人、天上妙肴馔而能不食？

“迦叶，以如是譬及余无量无边譬喻，当知是生实为大苦。迦叶，是名菩萨住于大乘大涅槃经观于生苦。

“迦叶，云何菩萨于是大乘大涅槃经观于老

<sup>111</sup> 大正藏：复次，善男子

<sup>112</sup> 大正藏：寿；永乐北藏及龙藏：受

<sup>113</sup> 大正藏：天



苦？老者，能为嗽逆上气，能坏勇力；忆念进持盛年快乐，僇慢贡高，安隐自恣；能作背偻，懈怠懒堕，为他所轻。迦叶，譬如池水，莲华满中，开敷鲜荣，甚可爱乐；值天降雹，悉皆破坏。善男子，老亦如是，悉能破坏盛壮好色。

“复次，迦叶，譬如国王，有一智臣，善知兵法，有敌国王，拒逆不顺，王遣此臣，往讨伐之，即便擒获，将来诣王。老亦如是，擒获壮色，将付死王。

“复次，迦叶，譬如折轴，无所复用；老亦如是，无所复用。

“复次，迦叶，如大富家，多有财宝，金、银、琉璃、珊瑚、琥珀、砗磲、码瑙。有诸怨贼，若入其家，即能劫夺，悉令空尽。善男子，盛年好色亦复如是，常为老贼之所劫夺。

“复次，迦叶，譬如贫人，贪著上膳<sup>114</sup>细软衣裳，虽复希望而不能得。善男子，老亦如是，虽有贪心，欲受富乐，五欲自恣，而不能得。

“复次，迦叶，如陆地龟，心常念水。善男子，人亦如是，既为衰老之所干枯，心常忆念壮时所受五欲之乐。

<sup>114</sup> 大正藏：饍

“复次，迦叶，犹如秋月所有莲华，皆为一  
切之所爱<sup>115</sup>见；及其萎黄，人所恶贱。善男子，  
盛年壮色亦复如是，悉为一切之所爱乐；及其老  
至，众所恶贱。

“复次，迦叶，譬如甘蔗，既被压已，滓无  
复味。壮年盛色亦复如是，既被老压，无三种味：  
一，出家味；二，读诵味；三，坐禅味。

“复次，迦叶，譬如满月，夜多光明，昼则  
不尔。善男子，人亦如是，壮则端严，形貌瓌伟<sup>116</sup>；老则衰羸，形神枯悴<sup>117</sup>。

“复次，迦叶，譬如有王，常以正法治国理  
民，直<sup>118</sup>实无曲，慈悯好施。时，为敌国之所破  
坏，流离逃迸，远至他土。他土人民见而悯之，  
咸作是言：‘大王往日正法治国，不枉万姓，如  
何一旦流离至此？’善男子，人亦如是，既为衰  
老所坏败已，常赞壮时，所行事业。

“复次，迦叶，譬如灯炷，唯赖膏油，膏油  
既尽，势不久停。善男子，人亦如是，唯赖壮膏，  
壮膏既尽，衰老之炷何得久停？

“复次，迦叶，譬如枯河，不能利益人及非

<sup>115</sup> 大正藏：乐

<sup>116</sup> 大正藏：玮

<sup>117</sup> 大正藏：頽

<sup>118</sup> 大正藏：真



人、飞鸟、走兽。善男子，人亦如是，为老所枯，不能利益一切作业。

“复次，迦叶，譬如河岸临岭之<sup>119</sup>树，若遇暴风，必当颠坠。善男子，人亦如是，临老险岸，死风既至，势不得住。

“复次，迦叶，如车轴折，不任重载。善男子，老亦如是，不能咨受一切善法。

“复次，迦叶，譬如婴儿，为人所轻。善男子，老亦如是，常为一切之所轻毁。

“迦叶，以是等譬及余无量无边譬喻，当知是老，实为大苦。迦叶，是名菩萨修行<sup>120</sup>大乘大涅槃经观于老苦。

“迦叶，云何菩萨摩诃萨修行大乘大涅槃经观于病苦？所谓病者，能坏一切安隐乐事，譬如雹雨，伤坏谷苗。

“复次，迦叶，如人有怨，心常忧愁而怀恐怖。善男子，一切众生亦复如是，常畏病苦，心怀忧戚。

“复次，迦叶，譬如有人，形貌端正，为王夫人欲心所爱，遣信逼呼<sup>121</sup>，与共交通。时王收

<sup>119</sup> 大正藏：大

<sup>120</sup> 大正藏：是名菩萨摩诃萨修行大乘

<sup>121</sup> 大正藏：唤

<sup>122</sup>得，挑其一目，截其一耳，断一手足。是人尔时，形容改异，人所恶贱。善男子，人亦如是，先虽端严，耳目具足，既为病苦所缠逼已，则为众人之所恶贱。

“复次，迦叶，譬如芭蕉、竹苇及骡，有子则死。善男子，人亦如是，有病则死。

“复次，迦叶，如转轮王，主兵大臣常在前导，王随后行；亦如鱼王、蚁王、螺<sup>123</sup>王、牛王、商主，在前行时，如是诸众，悉皆随从，无舍离者。善男子，死转轮王亦复如是，常随病臣，不相舍离；鱼、蚁、螺、牛、商主病王亦复如是，常为死众之所随逐。

“迦叶，病因缘者，所谓苦恼、忧愁<sup>124</sup>、悲叹<sup>125</sup>、身心不安；或为怨贼之所逼害，破坏浮囊，发撤<sup>126</sup>桥梁；亦能劫夺正命<sup>127</sup>根本，复能破坏盛壮好色、力势、安乐，除舍惭愧，能为身心焦热炽然。

“以是等譬及余无量无边譬喻，当知病苦是为大苦。迦叶，是名菩萨摩诃萨修行大乘大涅槃

<sup>122</sup> 大正藏：捕

<sup>123</sup> 大正藏：蚕

<sup>124</sup> 大正藏：愁忧

<sup>125</sup> 大正藏：叹

<sup>126</sup> 大正藏：拔撤

<sup>127</sup> 大正藏：念



经观于病苦。

“迦叶，云何菩萨修行大乘大涅槃经观于死苦？所谓死者，能烧灭故。

“迦叶，如火灾起，能烧一切，唯除二禅，力不至故。善男子，死火亦尔，能烧一切，唯除菩萨住于大乘大般涅槃，势不及故。

“复次，迦叶，如水灾起，一切漂没，唯除三禅，力不至故。善男子，死水亦尔，漂没一切，唯除菩萨住于大乘大般涅槃。

“复次，迦叶，如风灾起，能吹一切，悉令散灭，唯除四禅，力不至故。善男子，死风亦尔，悉能吹灭一切所有，唯除菩萨住于大乘大般涅槃。”

迦叶菩萨白佛言：“世尊！彼第四禅，以何因缘，风不能吹，水不能漂，火不能烧？”

佛告迦叶：“善男子，彼第四禅，内外过患一切无故。善男子，初禅过患，内有觉观，外有火灾；二禅过患，内有欢喜，外有水灾；三禅过患，内有喘息，外有风灾。善男子，彼第四禅，内外过患一切悉无，是故诸灾不能及之。善男子，菩萨摩訶萨亦复如是，安住大乘大般涅槃，内外过患一切皆尽。是故，死王不能及之。

“复次，善男子，如金翅鸟，能啖能消一切龙、鱼、金、银等宝，唯除金刚不能令消。善男子，死金翅鸟亦复如是，能啖能消一切众生，唯不能消住于大乘大般涅槃菩萨摩訶萨。

“复次，迦叶，譬如河岸所有草木，大水暴长<sup>128</sup>，悉随漂流入于大海，唯除杨柳，以其软故。善男子，一切众生亦复如是，悉皆随流入于死海，唯除菩萨住于大乘大般涅槃。

“复次，迦叶，如那罗延悉能摧伏一切力士，唯除大风。何以故？以无碍故。善男子，死那罗延亦复如是，悉能摧伏一切众生，唯除菩萨住于大乘大般涅槃。何以故？以无碍故。

“复次，迦叶，譬如有人，于怨憎中，诈现亲善，常相追逐，如影随形，伺求其便，而欲杀之。彼怨谨慎，坚牢自备，故使是人不能得杀。善男子，死怨亦尔，常伺众生，而欲杀之，唯不能杀住于大乘大般涅槃菩萨摩訶萨。何以故？以是菩萨不放逸故。

“复次，迦叶，譬如卒降金刚暴<sup>129</sup>雨，悉坏药木、诸树、山林、土沙、瓦石、金银、琉璃一

<sup>128</sup> 大正藏：瀑漲

<sup>129</sup> 大正藏：瀑



切之物，唯不能坏金刚真宝。善男子，金刚死雨亦复如是，悉能破坏一切众生，唯除金刚菩萨住于大乘大般涅槃。

“复次，迦叶，如金翅鸟，能啖诸龙，唯不能啖受三归者。善男子，死金翅鸟亦复如是，能啖一切无量众生，唯除菩萨住三定者。何谓三定？空无相愿。

“复次，迦叶，如摩罗毒蛇，凡有所螫，虽有良呪、上妙好药，无如之何，唯阿竭多星呪能令除愈。善男子，死毒所螫亦复如是，一切医方无如之何，唯除菩萨住于大乘大般涅槃呪。

“复次，迦叶，譬如有人，为王所瞋，其人若能以软善语、贡上财宝便可得脱。善男子，死王不尔，虽以软语、钱财、珍宝而贡上之，亦不得脱。善男子，夫死者，于险难处无有资粮，去处悬远而无伴侣，昼夜常行不知边际，深邃幽闇无有灯明，入无门户而有处所，虽无痛处不可疗治，往无遮止到不得脱，无所破坏见者愁毒，非是恶色而令人怖，敷在身边不可觉知。

“迦叶，以是等譬及余无量无边譬喻，当知是<sup>130</sup>死真为大苦。迦叶，是名菩萨修行大乘大涅

<sup>130</sup> 大正藏：是；永乐北藏及龙藏：生

槃经观于死苦。

“迦叶，云何菩萨住于大乘大涅槃经观爱别离苦？

“爱别离苦能为一切众苦根本。如说：

因爱生忧 因爱生畏<sup>131</sup>

若离贪<sup>132</sup>爱 何忧何畏<sup>133</sup>

“爱因缘故，则生忧苦；以忧苦故，则令众生生于衰老爱别离苦，所谓命终。善男子，以别离故，能生种种微细诸苦，今当为汝分别显示。

“善男子，过去之世人寿无量，时世有王，名曰善住，其王尔时，为童子身、太子治事及登王位各八万四千岁。时，王顶上生一肉疱，其疱柔软，如兜罗绵、细软劫贝，渐渐增长不以为患。足满十月，疱即开剖，生一童子，其形端正，奇异少双，色像分明，人中第一。父王欢喜，字曰顶生。时，善住王即以国事委付顶生，弃舍宫殿、妻子、眷属，入山学道，满八万四千岁。

“尔时，顶生于十五日，处在高楼，沐浴受斋。即于<sup>134</sup>东方有金轮宝，其轮千辐，毂辘具足，不由工匠，自然成就，而来应之。顶生大王即作

<sup>131</sup> 大正藏：怖

<sup>132</sup> 大正藏：于

<sup>133</sup> 大正藏：怖

<sup>134</sup> 大正藏：时



是念：‘我昔曾闻五通仙说：“若刹利王，于十五日处在高楼沐浴受斋，若有金轮，千辐不减，毂辋具足，不由工匠，自然成就，而来应者，当知是王即当得作转轮圣帝。”’复作是念：‘我今当试。’即以左手擎此轮宝，右执香炉，右膝著地而发誓言：‘是金轮宝，若实不虚，应如过去转轮圣王所行道法。’作是誓已，是金轮宝飞升虚空遍十方已，还来住在顶生左手。尔时，顶生心生欢喜，踊跃无量，复作是言：‘我今定作转轮圣王。’

“其后不久，复有象宝，状貌端严如白莲华，七支拄地。顶生见已，复作是念：‘我昔曾闻五通仙说：“若转轮王，于十五日，处在高楼，沐浴受斋，若有象宝，状貌端严如白莲华，七支拄地，而来应者，当知是王即是圣帝。”’复作是念：‘我今当试。’即擎香炉，右膝著地而发誓言：‘是白象宝，若实不虚，应如过去转轮圣王所行道法。’作是誓已，是白象宝，从旦至夕，周遍八方，尽大海际，还住本处。尔时，顶生心大欢喜，踊跃无量。复作是言：‘我今定是转轮圣王。’

“其后不久，次有马宝，其色绀艳，髦尾金色。顶生见已，复作是念：‘我昔曾闻五通仙说：

“若转轮王，于十五日，处在高楼，沐浴受斋，若有马宝，其色绀艳，髦尾金色，而来应者，当知是王即是圣帝。”‘复作是念：‘我今当试。’即执香炉，右膝著地而发誓言：‘是绀马宝，若实不虚，应如过去转轮圣王所行道法。’作是誓已，是绀马宝从旦至夕周遍八方，尽大海际还住本处。尔时，顶生心大欢喜，踊跃无量。复作是言：‘我今定是转轮圣王。’

“其后不久，复有女宝，形容端正，微妙第一，不长不短，不白不黑，身诸毛孔出梅檀香，口气香洁如青莲华；其目远视见一由旬，耳闻鼻嗅亦复如是，其舌广大，出能覆面，形色细薄，如赤铜鍱<sup>135</sup>。心识聪哲，有大智慧，于诸众生常有软语。是女以手触王衣时，即知王身安乐病患，亦知王心所缘之处。尔时，顶生复作是念：‘若有女人能知王心，即是女宝。’

“其后不久，于王宫内自然而有宝摩尼珠，纯青琉璃大如车毂，能于闇中照一由旬。若天降雨，滂如车轴，是珠势力能作大盖覆一由旬，遮此大雨不令下过。尔时，顶生复作是念：‘若转轮王得是宝珠，必是圣帝。’

<sup>135</sup> 大正藏：叶



“其后不久，有主藏臣自然而出，多饶财宝，巨富无量，库藏盈溢，无所乏少，报得眼根力能彻见一切地中所有伏藏，随王所念，皆能办之。尔时，顶生复欲试之，即共乘船入于大海，告藏臣言：‘我今欲得珍异之宝。’藏臣闻已，即以两手挠大海水，时十指头出十宝藏，以奉圣王，而白王言：‘大王所须，随意用之，其余在者，当投大海。’尔时，顶生心大欢喜，踊跃无量。复作念言：‘我今定是转轮圣王。’

“其后不久，有主兵臣自然而出，勇健猛略，策谋第一，善知四兵。若任斗者，则现圣王；若不任者，退不令现。未摧伏者，能令摧伏；已摧伏者，力能守护。尔时，顶生复作是念：‘若转轮王得是兵宝，当知定是转轮圣王。’

“尔时，顶生转轮圣帝告诸大臣：‘汝等当知，此阎浮提安隐丰乐，我今已有七宝成就、千子具足，更何所为？’诸臣答言：‘唯然，大王，东弗婆提犹未归德，王今应往。’尔时，圣王即与七宝、一切营从，飞空而往东弗婆提，彼土人民欢喜归化。

“复告大臣：‘我阎浮提及弗婆提安隐丰乐，人民炽盛，悉来归化，七宝成就，千子具足，复

何所为？’ 诸臣答言：‘唯然，大王，西瞿陀尼犹未归德。’ 尔时，圣王复与七宝、一切营从，飞空而往西瞿陀尼。王既至彼，彼土人民亦复归伏。

“复告大臣：‘我阎浮提、及弗婆提、此瞿陀尼安隐丰乐，人民炽盛，悉来归化<sup>136</sup>，七宝成就，千子具足，复何所为？’ 诸臣答言：‘唯然，大王，北郁单越犹未归化。’ 尔时，圣王复与七宝、一切营从，飞空而往北郁单越。王既至彼，彼土人民欢喜归德。

“复告大臣：‘我四天下安隐丰乐，人民炽盛，咸已归德，七宝成就，千子具足，更何所为？’ 诸臣答言：‘唯然，圣王！三十三天寿命极长，安隐快乐。彼天身形端严无比，所居宫殿、床榻、卧具悉是七宝，自恃天福未来归化，今应往讨，令其摧伏。’

“尔时，圣王复与七宝、一切营从，飞腾虚空上忉利天，见有一树，其色青绿。圣王见已，即问大臣：‘此是何色？’ 大臣答言：‘此是波利质多罗树，忉利诸天，夏三月时<sup>137</sup>，常于其下娱

<sup>136</sup> 大正藏：皆以归化

<sup>137</sup> 大正藏：日



乐受乐。’又见白色，犹如白云，复问大臣：‘彼是何色？’大臣答言：‘是善法堂，忉利诸天常集其中，论人天事。’

“于是，天主释提桓因知顶生王已来在外，即出迎逆。见已执手，升善法堂，分座而坐。彼时，二王形容相貌，等无差别，唯有视眴为别异耳。是时，圣王即生念言：‘我今宁可退彼王位，即住其中为天王不？’

“善男子，尔时，帝释受持读诵大乘经典，开示分别为他演说，唯于深义未尽通达。以是读诵、受持、分别为他广说因缘力故，有大威德。善男子，是顶生王于此帝释生恶心已，即便堕落还阎浮提，与所爱念人天离别，生大苦恼，复遇恶病，即便命终。尔时，帝释，迦叶佛是；转轮圣王则我身是。

“善男子，当知如是爱别离者，极为大苦。善男子，菩萨摩訶萨尚忆过去如是等辈爱别离苦，何况菩萨住于大乘大涅槃经，而当不观现在之世爱别离苦？

“善男子，云何菩萨修行大乘大涅槃经观怨憎会苦？善男子，是菩萨摩訶萨观于地狱、畜生、饿鬼、人中、天上皆有如是怨憎会苦。譬如人观

牢狱、系闭、枷锁、杻械以为大苦；菩萨摩訶萨亦复如是，观于五道一切受生，悉是怨憎合会大苦。复次，善男子，譬如有人，常畏怨家、枷锁、杻械，舍离父母、妻子、眷属、珍宝、产业而远逃避。善男子，菩萨摩訶萨亦复如是，畏怖<sup>138</sup>生死，具足修行六波罗蜜，入于涅槃。迦叶，是名菩萨修行大乘大般涅槃观怨憎会苦。

“善男子，云何菩萨修行大乘大般涅槃观求不得苦？求者，一切尽求。尽求者，有二种：一，求善法；二，求不善法。善法未得苦，恶法未离苦，是为<sup>139</sup>略说五盛阴苦。

“迦叶，是名苦谛。”

尔时，迦叶菩萨摩訶萨白佛言：“世尊！如佛所说五盛阴苦，是义不然。何以故？如佛往昔告释摩男：‘若色苦者，一切众生不应求色；若有求者则不名苦。’如佛告诸比丘：‘有三种受：苦受、乐受、不苦不乐受。’如佛先为诸比丘说：‘若有人，能修行善法，则得受乐。’又如佛说：‘于善道中，六触受乐，眼见好色，是则为乐；耳、鼻、舌、身、意思好法，亦复如是。’如佛

<sup>138</sup> 大正藏：怖畏

<sup>139</sup> 大正藏：则



说偈：

持戒则为乐 身不受众苦  
睡眠得安隐 寤则心欢喜  
若受衣食时 诵习而经行  
独处于山林 如是为最乐  
若能于众生 昼夜常修慈  
因是得常乐 以不恼他故  
少欲知足乐 多闻分别乐  
无著阿罗汉 亦名为受乐  
菩萨摩诃萨 毕竟到彼岸  
所作众事办 是名为最乐

“世尊！如诸经中所说乐相，其义如是。如佛今说，云何当与此义相应？”

佛告迦叶：“善哉！善哉！善男子，善能咨问如来是义。善男子，一切众生，于下苦中横生乐想，是故，我今所说苦相与本不异。”

迦叶菩萨白佛言：“如佛所说于下苦中生乐想者，下生、下老、下病、下死、下爱别离、下求不得、下怨憎会、下五盛阴，如是等苦亦应有乐。世尊！下生者，所谓三恶趣；中生者，所谓人中；上生者，所谓天上。若复有人作如是问：‘若于下乐生于苦想，于中乐中生无苦乐想，于

上乐中生于乐想。’当云何答？世尊！若下苦中生乐想者，未见有人当受千罚，初一下时，已生乐想。若不生者，云何说言：‘于下苦中而生乐想。’”

佛告迦叶：“如是如是，如汝所说，以是义故，无有乐想。何以故？犹如彼人当受千罚，受一下已，即得脱者，是人尔时便生乐想。是故当知，于无乐中，妄生乐想。”

迦叶言：“世尊！彼人不以一下生于乐想，以得脱故而生乐想。”

“迦叶，是故，我昔为释摩男说五阴中乐，实不虚也。迦叶，有三受三苦。三受者，所谓乐受、苦受、不苦不乐受。三苦者，所谓苦苦、行苦、坏苦。善男子，苦受者，名为三苦，所谓苦苦、行苦、坏苦；余二受者，所谓行苦、坏苦。善男子，以是因缘，生死之中，实有乐受。菩萨摩訶萨以苦乐性不相舍离，是故说言：‘一切皆苦。’善男子，生死之中，实无有乐，但诸佛菩萨随顺世间说言有乐。”

迦叶菩萨白佛言：“世尊！诸佛菩萨若随俗说，是虚妄不<sup>140</sup>？如佛所说：‘修行善者，则受

<sup>140</sup> 大正藏：否



乐报，持戒安乐，身不受苦，乃至众事已办，是为最乐。’如是等经所说乐受，是虚妄不？若是虚妄，诸佛世尊，久于无量百千万亿阿僧祇劫，修菩提道，已离妄语，今作是说，其义云何？”

佛言：“善男子，如上所说诸受乐偈，即是菩提道之根本，亦能长养阿耨多罗三藐三菩提。以是义故，先于经中说是乐相。善男子，譬如世间所须资生，能为乐因，故名为乐，所谓女色、耽湎饮酒、上饌甘味、渴时得水、寒时遇火、衣服、瓔珞、象马车乘、奴婢、僮仆、金、银、琉璃、珊瑚、真珠、仓库谷米，如是等物世间所须，能为乐因，是名为乐。善男子，如是等物亦能生苦。因于女人生男子苦，忧愁悲泣乃至断命。因酒甘味乃至仓库<sup>141</sup>，亦能令人生大忧恼，以是义故，一切皆苦，无有乐相。

“善男子，菩萨摩訶萨于是八苦，解苦无苦。

“善男子，一切声闻、辟支佛等，不知乐因，为如是人，于下苦中，说有乐相。唯有菩萨住于大乘大般涅槃，乃能知是苦因乐因。

大般涅槃經卷第十一

<sup>141</sup> 大正藏：谷

# 大般涅槃经卷第十二

北凉天竺三藏昙无讖译 梵

宋沙门慧严慧观同谢灵运再治

## 圣行品第十九之二<sup>142</sup>

“善男子，云何菩萨摩訶萨住于大乘大般涅槃观察集谛？善男子，菩萨摩訶萨观此集谛是阴因缘。所谓集者，还爱于有。爱有二种：一，爱自己身；二，爱所须。复有二种：未得五欲，系心专求；既求得已，堪忍专著。复有三种：欲爱、色爱、无色爱。复有三种：业因缘爱、烦恼因缘爱、苦因缘爱。出家之人有四种爱。何等为四？衣服、饮食、卧具、汤药。复有五种：贪著五阴。随诸所须一切爱著、分别校<sup>143</sup>计无量无边。

“善男子，爱有二种：一者，善爱；二，不善爱。不善爱者，凡愚之求；善法爱者，诸菩萨求。善法爱者复有二种：不善与善。求二乘者，名为不善；求大乘者，是名为善。善男子，凡夫爱者，名之为集，不名为谛；菩萨爱者，名之实

<sup>142</sup> 大正藏：之二

<sup>143</sup> 大正藏：校



諦，不名為集。何以故？為度眾生所以受生，不以愛故而受生也。”

迦葉菩薩白佛言：“世尊！如佛世尊於余經中，為諸眾生說業為因緣，或說憍慢、或說六觸、或說無明為五盛陰而作因緣。今以何義，說四聖諦，獨以愛性為五陰因？”

佛贊迦葉：“善哉！善哉！善男子，如汝所說。諸因緣者，非為非因，但是五陰要因於愛。善男子，譬如大王，若出游巡，大臣、眷屬悉皆隨從；愛亦如是，隨愛行處，是諸結等亦復隨行。譬如膩衣，隨有塵著，著則隨住；愛亦如是，隨所愛處，業結亦住。復次，善男子，譬如濕地，則能生牙；愛亦如是，能生一切業煩惱牙。

“善男子，菩薩摩訶薩住是大乘大般涅槃，深觀此愛，凡有九種：一，如責<sup>144</sup>有余；二，如羅刹女婦；三，如妙華莖有毒蛇；四，如惡食性所不便而強食之；五，如淫女；六，如摩樓迦子；七，如瘡中癰肉；八，如暴風；九，如彗星。

“云何名為如責有余？善男子，譬如窮人，負他錢財，雖償欲畢，余未畢故，猶係在獄而不得脫。聲聞、緣覺亦復如是，以有愛習之余氣故，

<sup>144</sup> 大正藏：債（後同）

不能得成阿耨多罗三藐三菩提。善男子，是名如责有余。

“善男子，云何如罗刹女妇？善男子，譬如有人，得罗刹女纳以为妇，是罗刹女随所生子，生已便食；食子既尽，复食其夫。善男子，爱罗刹女亦复如是，随诸众生生善根子，随生随食；善子既尽，复食众生，令堕地狱、畜生、饿鬼，唯除菩萨。是名如罗刹女妇。

“善男子，云何如妙华茎毒蛇缠之？譬如有人，性爱好华，不见华茎毒蛇过患，即便前捉，捉已蛇螫，螫已命终。一切凡夫亦复如是，贪五欲华，不见是爱毒蛇过患而便受取，即为爱蛇之所毒螫，命终即堕三恶道中，唯除菩萨。是名如妙华茎毒蛇缠之。

“善男子，云何所不便食而强食之？譬如有人，所不便食，而强食之，食已腹痛，患下而死。爱食如是，五道众生强食贪著，以是因缘，堕三恶道，唯除菩萨。是名所不便食而强食之。

“善男子，云何如淫女？譬如愚人与淫女通，而彼淫女，巧作种种谄媚现亲，悉夺是人所有钱财，钱财既尽，便复驱逐。爱之淫女亦复如是，愚人无智与之交通，而是爱女夺其所有一切善法，



善法既尽，驱逐令堕三恶道中，唯除菩萨。是名如淫女<sup>145</sup>。

“善男子，云何如摩楼迦子？譬如摩楼迦子，若鸟食已，随粪堕地，或因风吹来，在树下即便生长，缠绕缚束<sup>146</sup>尼拘罗树，令不增长，遂至枯死。爱摩楼迦子亦复如是，缠缚凡夫所有善法，不令增长，遂至枯灭，既枯灭已，命终之后，堕三恶道，唯除菩萨。是名如摩楼迦子。

“善男子，云何如疮中瘕肉？如人久疮，中生瘕肉，其人要当勤心疗治，莫生舍心。若生舍心，瘕肉增长，虫疽复生，以是因缘，即便命终。凡夫愚人五阴疮瘕亦复如是，爱于其中而为瘕肉，应当勤心治爱瘕肉。若不治者，命终即堕三恶道中，唯除菩萨。是名如疮中瘕肉。

“善男子，云何如暴风？譬如暴风，能偃山夷岳，拔于深根。爱欲暴风亦复如是，于父母所而生恶心，能拔大智舍利弗等无上深固菩提根本，唯除菩萨。是名如暴风。

“善男子，云何如彗星？譬如彗星出现，天下一切人民饥馑病瘦，婴诸苦恼。爱之彗星亦复

<sup>145</sup> 大正藏：是名姪女

<sup>146</sup> 大正藏：纏繞束縛

如是，能断一切善根种子，令凡夫人孤穷饥馑，生烦恼病，流转生死，受种种苦，唯除菩萨。是名如彗星。

“善男子，菩萨摩訶萨住于大乘大般涅槃，观察爱结如是九种。善男子，以是义故，诸凡夫人有苦无谛；声闻、缘觉有苦有苦谛而无真实；诸菩萨等解苦无苦，是故无苦而有真谛。诸凡夫人有集无谛；声闻、缘觉有集有集谛；诸菩萨等解集无集，是故无集而有真谛。声闻、缘觉有灭非真；菩萨摩訶萨有灭有真谛。声闻、缘觉有道非真；菩萨摩訶萨，有道有真谛。

“善男子，云何菩萨摩訶萨住于大乘大般涅槃见灭、见灭谛？所谓断除一切烦恼。若烦恼断，则名为常；灭烦恼火，则名寂灭；烦恼灭故，则得受乐。诸佛菩萨求因缘故，故名为净；更不复受二十五有，故名出世；以出世故，故名为我常；于色、声、香、味、触等，若男若女、若生住灭、若苦若乐、不苦不乐，不取相貌故名毕竟寂灭真谛。善男子，菩萨如是住于大乘大般涅槃观灭圣谛。

“善男子，云何菩萨摩訶萨住于大乘大般涅槃观道圣谛？善男子，譬如闇中，因灯得见粗细



之物。菩萨摩訶萨亦复如是，住于大乘大般涅槃，因八圣道见一切法，所谓常、无常，有为、无为，有众生、非众生，物、非物，苦、乐，我、无我，净、不净，烦恼、非烦恼，业、非业，实、不实，乘、非乘，知、无知，陀罗骠、非陀罗骠，求那、非求那，见、非见，色、非色，道、非道，解、非解。善男子，菩萨如是住于大乘大般涅槃观道圣谛。”

迦叶菩萨白佛言：“世尊！若八圣道是道圣谛，义不相应。何以故？如来或说：‘信心为道，能度诸漏。’或时说：‘道，不放逸是。诸佛、世尊不放逸故，得阿耨多罗三藐三菩提；亦是菩萨助道之法。’或时说言：‘精进是道。’如告阿难：

‘若有人能勤修精进，则得成就阿耨多罗三藐三菩提。’或时说言：‘观身念处，若有系心精勤修习是身念处，则得成就阿耨多罗三藐三菩提。’

或时说言：‘正定为道。’如告大德摩訶迦叶：‘夫正定者，真实是道；非不正定而是道也。若入禅<sup>147</sup>定，乃能思惟五阴生灭，非不入<sup>148</sup>定能思惟也。’

或说一法：‘若人修习，能净众生，灭除一切忧

<sup>147</sup> 大正藏：正

<sup>148</sup> 大正藏：人

愁苦恼，逮得正法，所谓念佛三昧。’或复说言：

‘修无常想，是名为道。’如告比丘：‘有能多修无常想者，能得阿耨多罗三藐三菩提。’或说：

‘空寂阿兰若处，独坐思惟，能得速成阿耨多罗三藐三菩提。’或时说言：‘为人演法，是名为道。

若闻法已，疑网即断，疑网断已，则得阿耨多罗三藐三菩提。’或时说言：‘持戒是道。’如告阿

难：‘若有精勤修持禁戒，是人则度生死大苦。’

或时说言：‘亲近善友，是名为道。’如告阿难：

‘若有亲近善知识者，则具<sup>149</sup>净戒。若有众生能亲近我，则得发于阿耨多罗三藐三菩提心。’或

时说言：‘修慈是道。修学慈者，断诸烦恼，得不动处。’或时说言：‘智慧是道。’如佛昔为波

阇波提比丘尼说：‘姊妹，如诸声闻以智慧刀能断诸流、诸漏烦恼。’或时如来说：‘施是道。’

如佛往昔告波斯匿王：‘大王当知，我于往昔多行惠施，以是因缘，今日得成阿耨多罗三藐三菩

提。’世尊！若八圣道是道谛者，如是等经岂非虚妄？若彼诸经非虚妄者，彼中何缘不说八道为

道圣谛？若彼不说，如来往昔何故错谬？然我定知诸佛如来久离错谬。”

<sup>149</sup> 大正藏：安



尔时，世尊赞迦叶菩萨：“善哉！善哉！善男子，汝今欲知菩萨大乘微妙经典所有秘密，故作是问。善男子，如是诸经悉入道谛。

“善男子，如我先说，若有信道，如是信道是信根本，是能佐助菩提之道。是故，我说无有错谬。

“善男子，如来善知无量方便，欲化众生故，作如是种种说法。善男子，譬如良医，识诸众生种种病源，随其所患而为合药。并药所禁，唯水一种不在禁例，或服姜水、或甘草水、或细辛水、或黑石蜜水、或阿摩勒水、或尼婆罗水、或钵昼罗水、或服冷水、或服热水、或蒲萄水、或安石榴水。善男子，如是，良医善知众生所患种种，药虽多禁，水不在例。如来亦尔，善知方便于一法相，随诸众生分别广说种种名相。彼诸众生，随所说受，受已修习，除断烦恼，如彼病人，随良医教，所患得除。

“复次，善男子，如有一人，善解众语，在大众中。是诸大众，热渴所逼，咸发声言：‘我欲饮水！我欲饮水！’是人即时以清冷水随其种类说言是水，或言波尼、或言郁持<sup>150</sup>、或言鬲利

<sup>150</sup> 大正藏：特

蓝、或言婆利、或言波<sup>151</sup>耶、或言甘露、或言牛乳，以如是等无量水名为大众说。善男子，如来亦尔，以一圣道为诸声闻种种演说，从信根等至八圣道。

“复次，善男子，譬如金师，以一种金随意造作种种瓔珞，所谓钳锁、环钏、钗珰<sup>152</sup>、天冠、臂印，虽有如是差别不同，然不离金。善男子，如来亦尔，以一佛道随诸众生种种分别而为说之，或说一种，所谓诸佛一道无二。复说二种，所谓定、慧。复说三种，谓见、慧、智。复说四种，所谓见道、修道、无学道、佛道。复说五种，所谓信行道、法行道、信解脱道、见到道、身证道。复说六种，所谓须陀洹道、斯陀含道、阿那含道、阿罗汉道、辟支佛道、佛道。复说七种，所谓念觉分、择法觉分、精进觉分、喜觉分、除觉分、定觉分、舍觉分。复说八种，所谓正见、正思惟、正语、正业、正命、正精进、正念、正定。复说九种，所谓八道及信<sup>153</sup>。复说十种，所谓十力。复说十一种，所谓十力、大慈。复说十二种，所谓十力、大慈、大悲。复说十三种，所谓十力、

<sup>151</sup> 大正藏：婆

<sup>152</sup> 大正藏：鐙

<sup>153</sup> 大正藏：所謂八聖道及信



大慈、大悲、念佛三昧。复说十六种，所谓十力、大慈、大悲、念佛三昧，及佛所得三正念处。复说二十道，所谓十力、四无所畏、大慈、大悲、念佛三昧、三正念处。善男子，是道一体，如来昔日为众生故，种种分别。

“复次，善男子，譬如一火，因所燃故得种种名，所谓木火、草火、糠火、麩火、牛马粪火。善男子，佛道亦尔，一而无二，为众生故，种种分别。

“复次，善男子，譬如一识，分别说六，若至于眼，则名眼识，乃至意识，亦复如是。善男子，道亦如是，一而无二，如来为化诸众生故，种种分别。

“复次，善男子，譬如一色，眼所见者则名为色，耳所闻者则名为声，鼻所嗅者则名为香，舌所尝者则名为味，身所觉者则名为触。善男子，道亦如是，一而无二，如来为欲化众生故，种种分别。善男子，以是义故，以八圣道分名道圣谛。

“善男子，是四圣谛，诸佛世尊次第说之，以是因缘，无量众生得度生死。”

迦叶白佛言<sup>154</sup>：“世尊！昔佛一时，在恒河

<sup>154</sup> 大正藏：迦葉菩薩白佛言

岸尸首林中。尔时，如来取少<sup>155</sup>树叶告诸比丘：

‘我今手中所捉叶多，一切因地草木叶多？’诸比丘言：‘世尊！一切因地草木叶多，不可称计；如来所捉，少不足言。’‘诸比丘，我所觉了一切诸法，如因大地生草木等；为诸众生所宣说者，如手中叶。’世尊尔时说如是言：‘如来所了无量诸法。若入四谛则为已说；若不入者，应有五谛。’”

佛赞迦叶：“善哉！善哉！善男子，汝今所问则能利益、安隐、快乐无量众生。善男子，如是诸法，悉已摄在四圣谛中。”

迦叶菩萨复白佛言：“如是等法若在四谛，如来何故唱言不说？”

佛言：“善男子，虽复入中，犹不名说。何以故？善男子，知圣谛有二种智：一者，中；二者，上。中者，声闻缘觉<sup>156</sup>；上者，诸佛菩萨<sup>157</sup>。善男子，知诸阴苦，名为中智；分别诸阴有无量相，悉是诸苦，非是<sup>158</sup>声闻、缘觉所知，是名上智。善男子，如是等义，我于彼经竟不说之。

“善男子，知诸入者，名之为门，亦名为苦，是名中智；分别诸入有无量相，悉是诸苦，非诸

<sup>155</sup> 大正藏：小

<sup>156</sup> 大正藏：聲聞緣覺智

<sup>157</sup> 大正藏：諸佛菩薩智

<sup>158</sup> 大正藏：諸



声闻、缘觉所知，是名上智。如是等义，我于彼经亦不说之。

“善男子，知诸界者，名之为分，亦名为性，亦名为苦，是名中智；分别诸界有无量相，悉是诸苦，非诸声闻、缘觉所知，是名上智。善男子，如是等义，我于彼经亦不说之。

“善男子，知色坏相，是名中智；分别诸色有无量坏相<sup>159</sup>，悉是诸苦，非诸声闻、缘觉所知，是名上智。如是等义，我于彼经亦不说之。

“善男子，知受觉相，是名中智；分别诸受有无量觉相，非诸声闻、缘觉所知，是名上智。善男子，如是等义，我于彼经亦不说之。

“善男子，知想取相，是名中智；分别是想有无量取相，非诸声闻、缘觉所知，是名上智。如是等义，我于彼经亦不说之。

“善男子，知行作相，是名中智；分别是行无量作相，非诸声闻、缘觉所知，是名上智。善男子，如是等义，我于彼经亦不说之。

“善男子，知识分别相，是名中智；分别是识无量知相，非诸声闻、缘觉所知，是名上智。善男子，如是等义，我于彼经亦不说之。

<sup>159</sup> 大正藏：分別諸色有無量相

“善男子，知爱因缘能生五阴，是名中智；一人起爱无量无边，声闻、缘觉所不能知，能知一切众生所起如是等爱，是名上智。如是等义，我于彼经亦不说之。

“善男子，知灭烦恼，是名中智；分别烦恼不可称计，灭亦如是不可称计，非诸声闻、缘觉所知，是名上智。如是等义，我于彼经亦不说之。

“善男子，知是道相能离烦恼，是名中智；分别道相无量无边，所离烦恼亦无量无边，非诸声闻、缘觉所知，是名上智。如是等义，我于彼经亦不说之。

“善男子，知世谛者，是名中智；分别世谛无量无边不可称计，非诸声闻、缘觉所知。是名上智。如是等义，我于彼经亦不说之。

“善男子，知一切行无常<sup>160</sup>、诸法无我、涅槃寂灭是第一义，是名中智；知第一义无量无边不可称计，非诸声闻、缘觉所知，是名上智。如是等义，我于彼经亦不说之。”

尔时，文殊师利菩萨白佛言：“世尊！所说世谛、第一义谛，其义云何？世尊！第一义中有世谛不？世谛之中有第一义不？如其有者，即是

<sup>160</sup> 大正藏：善男子，一切行無常



一諦；如其无者，将非如来虚妄说耶？”

“善男子，世諦者，即第一义諦。”

“世尊！若尔者，则无二諦。”

佛言：“善男子，有善方便，随顺众生说有二諦。善男子，若随言说，则有二种：一者，世法；二者，出世法。善男子，如出世人之所知者，名第一义諦；世人知者，名为世諦。

“善男子，五阴和合称言某甲，凡夫众生随其所称，是名世諦；解阴无有某甲名字，离阴亦无某甲名字，出世之人如其性相而能知之，名第一义諦。

“复次，善男子，或有法<sup>161</sup>，有名有实；或复有法，有名无实。善男子，有名无实者，即是世諦；有名有实者，是第一义諦。善男子，如我、众生、寿命、知见、养育、丈夫、作者、受者，热时之焰<sup>162</sup>、乾闥婆城、龟毛、兔角、旋火之轮，诸阴、界、入，是名世諦；苦、集、灭、道，名第一义諦。

“善男子，世法有五种：一者，名世；二者，句世；三者，缚世；四者，法世；五者，执著世。

<sup>161</sup> 大正藏：或復有法

<sup>162</sup> 大正藏：炎

善男子，云何名世？男、女、瓶、衣、车乘、屋舍，如是等物是名名世。云何句世？四句一偈，如是等偈是名句世。云何缚世？卷合系结，束缚合掌，是名缚世。云何法世？如鸣椎集僧，严鼓戒<sup>163</sup>兵，吹贝知时，是名法世。云何执著世？如望远人有染衣者，生想执著，言：‘是沙门，非婆罗门。’见有结绳横佩身上，便生念言：‘是婆罗门，非沙门也。’是名执著世。

“善男子，如是名为五种世法。善男子，若有众生，于如是等五种世法心无颠倒，如实而知，是名第一义谛。

“复次，善男子，若烧、若割、若死、若坏，是名世谛；无烧、无割、无死、无坏，是名第一义谛。

“复次，善男子，有八苦相名为世谛；无生、无老、无病、无死、无爱别离、无怨憎会、无求不得、无五盛阴，是名第一义谛。

“复次，善男子，譬如一人，多有所能，若其走时，则名走者；若<sup>164</sup>收刈时，复名刈者；若<sup>165</sup>作饮食，名作食者；若治材木，则名工匠；锻

<sup>163</sup> 大正藏：誠

<sup>164</sup> 大正藏：或

<sup>165</sup> 大正藏：或



金银时，言金银师。如是一人，有多名字。法亦如是，其实是一而有多名。依因父母和合而生，名为世谛；十二因缘和合生者，名第一义谛。”

文殊师利菩萨白佛言：“世尊！所言实谛，其义云何？”

佛言：“善男子，言实谛者，名曰真法。善男子，若法非真，不名实谛。善男子，实谛者无颠倒，无颠倒者乃名实谛。善男子，实谛者，无有虚妄；若有虚妄不名实谛。善男子，实谛者，名曰大乘；非大乘者，不名实谛。善男子，实谛者，是佛所说，非魔所说；若是魔说、非佛说者，不名实谛。善男子，实谛者，一道清净，无有二也。善男子，有常、有乐、有我、有净，是则名为实谛之义。”

文殊师利白佛言：“世尊！若以真实为实谛者，真实之法即是如来、虚空、佛性。若如是者，如来、虚空及与佛性无有差别。”

佛告文殊师利：“有苦有谛有实，有集有谛有实，有灭有谛有实，有道有谛有实。善男子，如来非苦非谛是实，虚空非苦非谛是实，佛性非苦非谛是实。

“文殊师利，所言苦者，为无常相，是可断

相，是为实谛。如来之性，非苦、非无常、非可断相，是故为实；虚空、佛性亦复如是。

“复次，善男子，所言集者，能令五阴和合而生，亦名为苦、亦名为<sup>166</sup>常，是可断相，是为实谛。善男子，如来非是集性，非是阴因，非可断相，是故为实；虚空、佛性亦复如是。

“善男子，所言灭者，名烦恼灭，亦常、无常。二乘所得，名曰无常；诸佛所得，是则名常，亦名证法，是为实谛。善男子，如来之性不名为灭，能灭烦恼，非常、无常，不名证法<sup>167</sup>，常住无变，是故为实；虚空、佛性亦复如是。

“善男子，道者能断烦恼，亦常、无常，是可修法，是为<sup>168</sup>实谛。如来非道，能断烦恼，非常、无常，非可修法，常住不变，是故为实；虚空、佛性亦复如是。

“复次，善男子，言真实者，即是如来；如来者，即是真实。真实者，即是虚空；虚空者，即是真实。真实者，即是佛性；佛性者，即是真实。

“文殊师利，有苦、有苦因、有苦尽、有苦

<sup>166</sup> 大正藏：無；永樂北藏及龍藏：為

<sup>167</sup> 大正藏：知

<sup>168</sup> 大正藏：名



对。如来非苦乃至非对，是故为实，不名为谛；虚空、佛性亦复如是。苦者，有为、有漏、无乐。如来非有为、非有漏，湛然安乐，是实非谛。”

文殊师利白佛言：“世尊！如佛所说：‘不颠倒者，名为实谛。’若尔者，四谛之中有四倒不？如其有者，云何说言无有颠倒名为实谛，一切颠倒不名为实？”

佛告文殊师利：“一切颠倒皆入苦谛。如诸众生有颠倒心，名为颠倒。善男子，譬如有人，不受父母尊长教勅，虽受不能随顺修行，如是人等，名为颠倒。如是颠倒非不是苦，即是苦也。”

文殊师利言：“如佛所说：‘不虚妄者，即是实谛。’若尔者，当知虚妄，则非实谛。”

佛言：“善男子，一切虚妄皆入苦谛。如有众生，欺诳于他，以是因缘，堕于地狱、畜生、饿鬼，如是等法，名为虚妄。如是虚妄非不是苦，即是苦也。声闻、缘觉、诸佛世尊远离不行，故名虚妄。如是虚妄，诸佛、二乘所断除故，故名实谛。”

文殊师利言：“如佛所说大乘是实谛者，当知声闻、辟支佛乘则为不实。”

佛言：“文殊师利，彼二乘者，亦实、不实。”

声闻、缘觉断诸烦恼，则名为实；无常不住是变易法，名为不实。”

文殊师利言：“如佛所说：‘若佛所说名为实者，当知魔说则为不实。’世尊！如魔所说，圣谛摄不？”

佛言：“文殊师利，魔所说者，二谛所摄，所谓苦、集。凡是一切非法、非律，不能令人而得利益，终日宣说亦无有人见苦、断集、证灭、修道，是名虚妄。如是虚妄名为魔说。”

文殊师利言：“如佛所说一道清净，无有二者，诸外道等亦复说言：‘我有一道，清净无二。’若言一道是实谛者，与彼外道有何差别？若无差别，不应说言一道清净。”

佛言：“善男子，诸外道等有苦、集谛，无灭、道谛，于非灭中而生灭想，于非道中而生道想，于非果中而生果想，于非因中而生因想。以是义故，彼无一道清净无二。”

文殊师利言：“如佛所说‘有常、有我、有乐、有净是实义’者，诸外道等应有实谛，佛法中无。何以故？诸外道辈亦复说言：‘诸行是常。’云何是常？可意、不可意、诸业报等受不失故。可意者，名十善报；不可意者，十不善报。若言



诸行皆悉<sup>169</sup>无常，而作业者于此已灭，谁复于彼受果报乎？以是义故，诸行是常。杀生因缘，故名为常。世尊！若言诸行悉无常者，能杀、可杀二俱无常。若无常者，谁于地狱而受罪报？若言定有地狱受报<sup>170</sup>，当知诸行实非无常。世尊！系心专念，亦名为常，所谓十年所念，乃至百年亦不忘失，是故为常。若无常者，本所见事谁忆？谁念？以是因缘，一切诸行非无常也。世尊！一切忆想亦名为常。有人先见他人手、足、头、项等相，后时若见，便还识之。若无常者，本相应灭。世尊！诸所作业以久修习，若从初学、或经三年、或经五年，然后善知，故名为常。世尊！算数之法从一至二、从二至三，乃至百千。若无常者，初一应灭。初一若灭，谁复至二？如是常一，终无有二。以一不灭故得至二，乃至百千，是故为常。世尊！如读诵法，诵一阿含至二阿含，乃至三、四阿含。如其无常，所可读诵终不至四。以是读诵增长因缘，故名为常。世尊！瓶、衣、车乘，如人负责<sup>171</sup>，大地形相，山河树林，药木草叶，众生治病，皆悉是常，亦复如是。世尊！

<sup>169</sup> 大正藏：悉皆

<sup>170</sup> 大正藏：若言定有地獄受報者

<sup>171</sup> 大正藏：債

一切外道皆作是说：‘诸行是常。’若是常者，即是实谛。

“世尊！有诸外道复言有乐。云何知耶？受者定得可意报故。世尊！凡受乐者必定得之，所谓大梵天王、大自在天、释提桓因、毗纽天及诸人天。以是义故，必<sup>172</sup>定有乐。世尊！有诸外道复言有乐，能令众生生求望故，饥者求食，渴者求饮，寒者求温，热者求凉，极者求息，病者求差，欲者求色。若无乐者，彼何缘求？以有求故<sup>173</sup>，故知有乐。世尊！有诸外道复作是言：‘施能得乐。’世间之人好施沙门、诸婆罗门、贫穷困苦，衣服、饮食、卧具、医药、象马车乘、<sup>174</sup>香、涂香、众华、屋宅、依止灯明，作如是等种种惠施，为我后世受可意报，是故当知决定有乐。世尊！有诸外道复作是言：‘以因缘故，当知有乐。’所谓受乐者，有因缘故，名为乐触。若无乐者，何得因缘？如无兔角，则无因缘；有乐因缘，则知有乐。世尊！有诸外道复作是言：‘上中下故，当知有乐。’下受乐者，释提桓因；中受乐者，大梵天王；上受乐者，大自在天。以

<sup>172</sup> 大正藏：名

<sup>173</sup> 大正藏：者

<sup>174</sup> 大正藏：末



有如是上中下故，当知有乐。

“世尊！有诸外道复言有净。何以故？若无净者，不应起欲；若起欲者，当知有净。又复说言：‘金、银、珍宝、琉璃、玻瓈、砗磲、码瑙、珊瑚、真珠、璧玉、珂贝、流泉、浴池、饮食、衣服、华香、<sup>175</sup>糝香、涂香、灯烛之明，如是等物悉是净法。’复次，有净，谓五阴者即是净器，盛诸净物，所谓人、天、诸仙、阿罗汉、辟支佛、菩萨、诸佛。以是义故，名之为净。

“世尊！有诸外道复言有我，有所睹见，能造作故。譬如有人，入陶师家，虽复不见陶师之身，以见轮绳，定知其家必是陶师。我亦如是，眼见色已，必知有我。若无我者，谁能见色？闻声乃至触法，亦复如是。复次，有我。云何得知？因相故知。何等为相？喘息、视眴、寿命、役心、受诸苦乐、贪求、瞋恚，如是等法悉是我相，是故当知必定有我。复次，有我，能别味故。有人食果，见已知味，是故当知必定有我。复次，有我。云何知耶？执作业故。执镰能刈，执斧能斫，执瓶盛水，执车能御，如是等事我执能作，是故当知必定有我。复次，有我。云何知耶？即于生

<sup>175</sup> 大正藏：末

时，欲得乳哺，乘宿习故，以是<sup>176</sup>当知必定有我。复次，有我云何知耶？和合利益他众生故。譬如瓶、衣、车乘、田宅、山林、树木、象、马、牛、羊如是等物，若和合者，则有利益。此内五阴亦复如是，眼等诸根有和合故，则利益我，是故当知必定有我。复次，有我。云何知耶？有遮法故。如有物故，则有遮阂<sup>177</sup>；物若无者，则无有遮。若有遮者，则知有我，是故当知必定有我。复次，有我。云何知耶？伴非伴故。亲与非亲非是伴侣，正法、邪法亦非伴侣，智与非智亦非伴侣，沙门非沙门、婆罗门非婆罗门、子非子、昼非昼、夜非夜、我非我，如是等法为伴非伴，是故当知必定有我。

“世尊！诸外道等种种说有常、乐、我、净，当知定有常、乐、我、净。世尊！以是义故，诸外道等亦得说言：‘我有真谛。’”

佛言：“善男子，若有沙门、婆罗门，有常、有乐、有我、有净<sup>178</sup>者，是非沙门、非婆罗门。何以故？迷于生死，离一切智大导师故。如是沙门、婆罗门等，沈没诸欲，善法羸损故。是诸外

<sup>176</sup> 大正藏：是故

<sup>177</sup> 大正藏：礙

<sup>178</sup> 大正藏：有常、有樂、有淨、有我



道系在貪欲、瞋恚、痴癡，堪忍愛樂故。是諸外道雖知業果自作自受，而猶不能遠離惡法。是諸外道非是正法正命自活。何以故？無智慧火，不能消故。是諸外道雖欲貪著上妙五欲，貧于善法不勤修故。是諸外道雖欲往至正解脫中，而持戒足不成就故。是諸外道雖欲求樂，而不能求樂因緣故。是諸外道雖復憎惡一切諸苦，然其所行未能遠離諸苦因緣。是諸外道雖為四大毒蛇所纏，猶行放逸，不能謹慎。是諸外道無明所覆，遠離善友，樂在三界無常熾然大火之中而不能出。是諸外道遇諸煩惱難愈之病，而復不求大智良醫。是諸外道方于未來當涉無邊險遠之路，而不知以善法資糧而自莊嚴。是諸外道常為淫欲災毒所害，而反抱持五欲霜毒。是諸外道瞋恚熾盛，而復反更親近惡友。是諸外道常為無明之所覆蔽，而反推求邪惡之法。是諸外道常為邪見之所誑惑，而反于中生親善想。是諸外道希食甘果，而種苦子。是諸外道已處煩惱闇室之中，而反遠離大智炬明。是諸外道患煩惱渴，而復又<sup>179</sup>飲諸欲鹹水。是諸外道漂沒生死無邊大河，而復遠離無上船師。是

<sup>179</sup> 大正藏：反

诸外道迷惑诸<sup>180</sup>倒言诸行常。诸行若常，无有是处。

大般涅槃经卷第十二

---

<sup>180</sup> 大正藏：顛



## ● 结诵仪

### 补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無大般涅槃经 (合掌三称)

### 发愿文

(一遍)

志心忏悔。我(某甲)与一切众生，从无始来，迷失真心，流转生死，六根罪障，无量无边，圆妙佛乘，无以开解，一切所愿，不得现前。我今读诵大般涅槃经，以此善根，发露黑恶，过、现、

未来三业所造无边重罪，皆得消灭，身心清净，惑障蠲除，福智庄严，净因增长，自他行愿速得圆成。愿诸如来常在说法，所有功德起随喜心，回向菩提，证常乐果。命终之日，正念现前，面见弥陀及诸圣众，一刹那顷，生莲华中。普愿众生，俱成佛道。

## 回向偈

(一遍)

诵经功德殊胜行 无边胜福皆回向  
普愿沉溺诸有情 速往无量光佛刹  
十方三世一切佛 一切菩萨摩訶萨  
摩訶般若波罗蜜

## 回向偈

(一遍)

愿以此功德 庄严佛净土  
上报四重恩 下济三途苦  
若有见闻者 悉发菩提心  
尽此一报身 同生极乐国



## 三皈依

(一遍)

自皈依佛，当愿众生，体解大道，发无上心。  
自皈依法，当愿众生，深入经藏，智慧如海。自  
皈依僧，当愿众生，统理大众，一切无碍，和南  
圣众。



此咒置经书中可灭误跨之罪

南无护法韦驮尊天菩萨

